

蘇州府志

八


卷之十七
學校二
卷之十八
軍制


九	漢書門
一八	
四三	
三一	
三	
冊架函號類	

內閣文庫

九〇八三
二〇三二
六二


內閣文庫	
番號	漢 9083
冊數	32 (8)
函號	292 13





蘇州府志卷第十七

學校二



長洲縣學在縣治東北一里宋初縣未有學士附肄府學名麗

澤齋景定二年主學宋楚材率邑人請於守陳均即廣化寺

藏室剏建講堂曰禮堂魏了翁篆額四齋曰富文貴德廣業

博學又作景文堂以企慕鄉賢范文正公友德堂繪學中士

登大魁者黃由阮登炳像於壁八年提刑洪起畏拓地闢門

面南後毀元初即縣驛舍為

至聖廟大德六年縣移郡治側乃即縣治故址為學至元三年

達魯花赤元童俾教諭顧元龍耆儒邊景元禮勸郡人前徽

州路教授陸德原輸貲營建

陳旅記

明洪武初知縣宋敏文張

翔相繼修葺闢學門於廟之右成化九年知府邱霽拓地東

南改建正德十六年知縣郭波建尊經閣嘉靖十五年知縣

賀府修二十年教諭蕭文佐以地隘不稱白巡按御史舒汀

知府王庭相與規度以福寧廢寺地遷而新之即今所也

徐縉

記二十二年巡按御史徐恪修四十二年知府徐節重修隆

慶二年知縣周良臣教諭李國珍建騰蛟起鳳塞門萬歷中

巡撫都御史陳道基更營之規制乃備

本朝順治十一年提學侍讀石申教諭王瑀踵修尋有鎮帥居

之殿堂啟聖祠尊經閣悉毀壞康熙二十一年邑人侍講彭

定求力謀興復自巡撫以下各捐俸委教諭姚文焱訓導王

玠諸生鈕希文重建而啟聖祠後十餘年始成

定求記

四十四

年邑人馬俊重建尊經閣道山亭

定求記

雍正三年析置元和

縣遂為長洲元和二縣學五年元和知縣江之煒長洲教諭

鄒增元和訓導孔傳燿倡修廟殿九年巡撫都御史尹繼善

泣視繕完乾隆六年郡人蔣楫蔣榮助修

宋吳必大禮堂記

而人參焉人之所以異於禽獸者以其有禮也飽食暖衣逸

居而無教則近於禽獸人而無禮不亦禽獸之心乎夫唯有

禽獸之心也弱之肉強之食爭端啟乖氣興而禍亂作矣故

曰壤國喪家亡人必先去其禮聖人因作天秩以教為之宮

室堂與之居為之簠簋俎豆之數為之殺裁食羹膾炙醢醬

葱藻酒漿脯修之用而恭敬辭遜以出之所以因情立文辨

分定志而固人之肌膚之會筋骸之束也所以達天理順人

道之大端也故唯聖人為能知人之不能以無欲也人之欲

莫大於飲食也故雖飲食有禮聖人安之君子行之衆人勉焉於是簞食豆羹由是則生而有不屑者矣肉乾人飢日晏不得食而有所不敢者矣吾嘗評斯人可使餓死於首陽立乾於河上而不可使犯非禮取非義夫安得不有益於人之國家長洲故無學撤緇廬以爲之學其究也士負笈造焉勸趨成俗則宋君楚材功多君既表其宮而新之燕食有堂命之曰禮堂問故曰吾於禮食有取也君之用心忠矣吾聞古人之在幼也能食教以右手能言教以唯俞教以男女之別長幼之序十年出就外傳乃所學也家有塾黨有庠術有序學則終今共之曲禮一書其識飲食之禮備矣嘗試言其略曰共食不飽共飯不澤手共食而飽非孫道也共飯而澤手爲其近於穢也曰流歎曰固獲曰揚飯曰嚙羹曰噉炙欲速也求多也凡可以得食者無不力也厚已而薄人也有聲而無容也終食之間須臾之離而賢不肖之趨霄中莫掩焉是以前吾語子禮其承而師孫而友謹而飢渴之害羣居終日唯善是務觴酒豆肉而成德寓焉幼之學壯而行禮不可勝用矣昔明道程子至天寧值僧方飯起見其趨進揖遜之盛而有三代威儀盡在是矣之歎禮失而求諸野盛服佩衿不猶瘡於野歟必不失是而後人其人廬其居足以關浮屠氏之

口以無墜宋君之善諸生皆曰謹受教咸淳二年九月朔俞琰學記古者比閭族黨莫不有學今環百里之地而爲縣詎可缺歟按吳郡志唐置長洲縣距今三百餘年而學不建豈簿書期會不暇俎豆之事未之聞歟景定壬戌詔縣增主學用丕儒教宋君楚材實在茲邈至之日乃歎曰官以主學名居無廬士無廩師倚席不講惕然以懼卿寓劉公震孫列其行於郡卽近縣廢寺爲肄習之所士不閒遠近裹糧而來旬有講月有試考德問業於此可觀宋君又懼無以繼乃哀俸餘與束脩之入請於郡因寺建學以惠悠久太守陳公均親來相度指前一塔矗如文筆顧而揖曰殆天相歟於是徙佛像於他所宋君遂與諸生經之營之斲者斤者亦各自獻其藝繇禮殿至學門煥然一新齋舍庖滷靡不具備起於乙丑春成於丙寅夏民有爭田不決前守撥克養士且上於朝會召入季公鏞來守是邦悉以歸之而士有所養宋君之志亦少舒究矣屬余記之辭不敏請益力夫教亦多術矣孟子喫緊誨人處曰學問之道無他求其放心而已矣蓋人之所以靈於萬物者以有心焉耳是心雖依血氣而生而一點光明具衆理應萬事未有觸之而不動感之而不應孩提之童莫不知愛其親及其長也莫不知敬其兄是之謂本心物交物引而去之此心放矣從耳之欲而好淫哇從目之欲而悅

紛華從口之欲而餒肥甘鼻之於臭四肢之於安佚亦莫不
然若放而不求流而忘反放僻邪侈無所不至而一點光明
未嘗泯沒反而求之心在我矣是故出入無時莫知其鄉一
息而游堯舜之天一息而淪盜跖之淵聖狂之分求不求耳
然此心之放亦豈俟其形著哉有所忿懣有所恐懼有所好
樂憂患而不得其正皆謂之放人能於日用之間每事省察
有不善未嘗不知知之未嘗復行顏何人哉希之則是嗚呼
孟子之所謂求放心者豈如釋氏死灰槁木付此心於無所
用哉自吾惻隱而推謂之仁自吾羞惡而推謂之義自吾辭
讓是非而推禮與智無不盡矣舉斯加彼可以參天地贊化
育此君子所以大過人者善推其所爲而已矣矧今撤緇廬
而敞儒宮立師道而新士習同堂合席相與講明當何如哉
始而省察以存此心之全體終而克廣以達此心之大用庶
乎可以爲士矣是又宋君之所深望故併書之咸淳二年四
月朔趙與鑒景文堂記吳郡立學自范文正公始附城兩縣
其有學也亦宜然自景祐以來二百餘年吳邑有而長洲缺
焉按吳郡志縣南一百步有孔子廟邑令王公禹偁嘗爲文
屬郡侯狀元柴成務爲之記今廟與碑不可復攷意者強室
兼并梵宮侵漁未有能經理之者景定四年制詔天下縣設
主學而宋君楚材來主長洲縣事宋君蜀之翁山人經明行

修於易尤邃辟難來吳隸職和靖書院嘗爲尹肅公請謚趨
向端的人皆賢之恕齋洪公勳與法從諸公共薦於朝俾兼
書院堂長以其未立學也已而鄉大夫士列詞於郡趣開試
乃卽近縣廢院爲講習之所師友裹糧月試旬課戶屢羣集
於是宋君就請以廢院爲學捐俸餘與束脩之入葺而新之
簽判方君山景雅相推敬會有兩爭沒官田爲擬克學廩太
守陳公均聞而是之未踰年而學有緒嚴像設崇講座黌舍
翼如衿佩檐如始無負天朝建學立師之意乃揭直舍之堂
曰景文焉文於守守屬與鑒爲之記然則宋君之意其唯范
公希文之是景乎與鑒不文何足以知之竊惟文正公宏勳
鉅節掀揭宇宙文章特其餘事方其上宰相書言朝政得失
民間利病凡萬餘言文正王公曾見而偉之及考其平生所
爲無出是書而尤以興學爲先務慶歷中開天章閣召問輔
臣爲治之要詔天下立學取士先德行不專文詞皆公所建
請然則文正之所謂文豈特摘章演義之云乎哉吳爲文正
之鄉吳學乃文正所謂立學又文正所請今長洲昉有學不
於文正乎景其誰景耶凡百君子入斯學登斯堂仰前修之
超卓思始創之艱難盍知所以自立云咸淳改元中元日方
山景友德堂記吳附邑獨長洲有縣無學寄廩郡庠養士景
定壬戌冬公朝詔各縣置主學宋君楚材始尸其任初至栖

柄無依貴寓列其事於郡即廢院講肄宋君繼請於漕臺及郡就改院為學月有試時有習矜佩誦誦文風大振來游茲學者阮公登炳乙丑冠南省以亮陰免廷對賜第登龍首先是淳熙辛丑黃公由孝廟親策為天下第一二公俱長洲人也宋君闢一室繪黃阮二大魁之像於上扁其堂曰友德屬山景紀其成山景辭不克當曰君亦有惠於茲學也奚辭向君贊畫吳幕有廢寺田四百餘畝胡居敬主西湖書院與有力者爭欲得之二券俱不直君執筆擬曰莫若以長洲之田養長洲之士遂欲歸於學楚材併復還郡庠之寄廩今士食於斯君亦與有力焉山景諾曰此養也非教也教以德為先德以友為輔獨昌黎謂詡詡笑語一旦下石焉者此可為友道一吁也故曰德有凶有吉正直忠良和平寬厚恭敬篤實皆吉德也邪佞剛復崎嶇嶮薄慢易輕浮皆凶德也納交者宜謹擇於斯則切磋琢磨相觀而善麗澤之益滋多矣否則墜韓子之譏雖然以吾有其德而後能友人之德善修德者深造自得居安資深心術之涵養踐履之純固立必有方行無越思友一鄉之士為未足又友一國之士直至於尚論古之人取友愈大德與俱大道義儔匹乎聖賢事業焜耀乎今古豈曰無所自云宋君蜀士老成有學問觀其興學可以知其德矣咸淳丙寅長至前三日錢說友改立學門記長洲縣

舊無學附府學以肄士景定中有旨勅主學員於是邑之士請諸臺郡即縣西廢寺為學綿蕪集事而宮墻門未正南向之位見謂闕典咸淳八年春邑之士有請於憲臺今提學損軒洪公亟俞之俾闢寺地以正學門輿望所屬不口而就所以為學之宮者內外於是乎備未幾有譁髡越訴於省部公詰而寘之刑事竟帖服諸生銜恩無斃咸願刊石以壽厥傳說友惟夫子之道千萬世一日南門之設制度焉耳於道無增然今之世浮圖之宇徧天下而素王之宮郡縣僅其一焉而扶植之不力則是有愧於思樂之頌矣公一舉而斥異端興吾道厥功茂焉不惟茲門之正而已也諸生出入是門藏修遊息涵泳公恩且與斯學相為悠久又不惟茲石之刊而已也說友為文學掾於斯邑樂諸生之請得遂而吾道之振起也故叙其事著於下方以告來者使知公德之無窮云元陳旅重建學記皇元混一六合興起學校以崇化基當時邑令即長洲驛舍為孔子廟大德六年縣徙麗郡明年移驛材構縣治故址庠隘簡陋師弟子登降周旋相盪摩又無所於休息郡人陸德原顧而歎曰席先世之貲產足以供公上之賦而具衣食於吾私矣於此而用其贏不亦可乎縣長元童公聞而喜曰是能紓吾責者益以禮勸成之於是筮吉日除故縣治地築長垣周之前起禮殿闢廣庭穹門翼以邃廡後

為西齋為論堂為庖庖凡所宜有者以次皆為之材必良工必善規制嚴壯而改作堅緻浙右邑校蓋未有能勝之者又屬名工凝土為先聖四伯十哲之像而繪羣賢於從祀之位道德之光宛然具在至元之三年三月經始明年十月告成觀者咨嗟謂世之人率罄其所有以為老佛氏之宮今亦有為是者乎德原又以為事雖美而歲入不足以養士則徒為虛器也乃又以田如千畝為學田以實之旅以國史之命如京師道出吳門邑之士夫請記之德原字靜遠今為徽州路儒學教授明朱希周遷學記長洲為蘇鉅邑而附於郡治自宋景定閒始立學於城之東北厥後毀而復創至於國朝又嘗拓地而改建矣顧其地猶為卑隘頃教諭蕭君文佐謀於諸生為遷改之計咸謂城東有僧寺高爽宏壯建學惟稱乃白於巡撫都憲歐陽公鐸夏公邦謨提學侍御馮公天馭楊公宜巡按侍御趙公繼本皆曰可既而海寇之警其事遂寢越明年諸生復白於巡按侍御舒公汀而郡守王侯庭縣令吳君世良亦以為請公乃躬詣僧寺而徧閱焉歎曰彼僧寺之居若是其侈也學校為養士之地顧弗稱耶是固所當遷改者不可已也遂委通守邊君德吳縣令張君道與吳君專董其事而貳守王君文儒通守包君梧牛君佐節推陳君一德亦共為之規畫於是即其宮室之舊或飾而為新或撤而

改造閒以舊學之可用者合而成之其制廟學皆南向其左由櫺星門而入重之以戟門而中為先聖殿殿之旁兩廡列焉其右由儒學門而入重之以禮門而中為明倫堂堂之旁為兩齋曰進德曰修業而齋之南北諸生之房舍列焉廟之北為啟聖祠又北為尊經閣堂之北為各宦鄉賢二祠又北壘石為山山之上為敬一亭尊御製也若夫櫺星門之前則樹以綽楔儒學門之外則鑿為泮池祭器有庫射圃有亭會饌有堂游息有所以至解宇倉廩之類各量其地之所宜而建置焉其隙地則有田數畝可供粢盛焉為園者三為橋者三為池為館者各一凡游觀之具靡不備矣乃若此地之形勝則山拱於西水滙於東前有橋曰昇龍內有河曰玉帶靈秀所鍾殆若預為學宮設者豈偶然哉是役也經始於嘉靖辛丑十二月以明年三月落成蓋惟諸君董其事者勤於綜理故其成功之速如此

先師廟

崇聖祠

名宦祠在 文廟東祀唐縣令蕭審岑仲翔滕遂尉談戡宋

蘇州府志 卷十一
縣令王禹偁知縣王嘉言劉立言鞠真卿常安民項公澤主
學宋楚材元達魯花赤元童明知縣宋敏文教諭周岐鳳知
縣張翔縣丞劉幹知縣余金教諭彭道知縣俞集教諭林僖
裴椿知縣李堯民祁承燠宋繼發訓導林有芝 本朝提學
許汝霖張元臣余正健驛鹽道蔡琦知府陳鵬年知縣許遇
浙江總督李衛

鄉賢祠在 文廟東祀唐麴信陵陸龜蒙宋胡元質黃由阮
登炳王蘋方惟深元浦源宋通明申屠衡王璣尤安禮俞士
悅練綱劉珏韓雍胡琮吳寬沈周沈林沈杰沈燾朱統王庭
金世龍錢有威王敬臣文嘉袁一虬顧其志顧九思管志道

張文奇伍袁萃陳允堅李鴻顧宗孟姚希孟文震孟陳仁錫
朱祖文宋學朱蔣燦陳元素吳适 本朝顧所載宋學程宋
宓宋世濬顧子咸顧子壯彭定求顧汧陸在新宋廣業

忠義孝悌祠在 文廟東 本朝雍正元年

詔建祀宋朱良明王光裕劉政徐謙盛景龔元祥盛王贊龔炳
衡徐道周尙賢鄧汝南王文祿孫永正 本朝歸聖脉顧天
朗程大儒朱之勸李漢孫鼎鐘邱存禮程文煥黃農盛建極
孫豐穀施濬張文魁徐國摺顧惟灝楊成懋吳中英
唐縣尉談戴祠在明倫堂後

舒公祠在明倫堂後祀明巡按御史汀舊在 文廟東明嘉

靖中建歲久圯 本朝康熙六十一年移建今所以 本朝

教諭王瑀侯文煊祔

朱中丞祠在 文廟東祀明督撫閩浙都御史統舊在文忠

烈祠西後圯廢 本朝雍正六年移建今所 明江盈科記畧公奉世廟特簡

督撫福浙於時寧紹間大豪猾要結權貴勾引島倭入內地以千數時肆殺掠公慮長此安窮乃選將厲士躬自督戰倭人喪膽諸豪猾見海寇既靖無所規利日夜啖權貴圖擊去公公自是中讒口削籍家居亡何發憤仰藥死之日貧不能具斂其夫人徐氏假貸無所得至絡緯以活諸孤自公死前豪猾復搆島倭犯內地日引月長釀成癸丑之變南浙淮揚間焚掠慘毒世廟盱食屬梅林胡公討平之議者追論秋匡不死獲竟厥施何至猖獗若此又何必勞士卒費金錢以百萬計然後奏蕩平之績哉在昔英廟北狩于忠肅公內固社稷外籌疆圉有再造功方其盡瘁事國假寓朝房以瓦器炊糜自食然卒不保首領卽梅林建平倭之績亦以讒死公一意報國權貴日挾彈箝丸不中不休嗚呼余嘗謂忠肅之

功在王文成之上文成世爵而忠肅之裔不得與於通侯梅林沒久公論始白贈謚蔭卹庶幾實當其功矣朱公之功不逮忠肅而清並之朱公之清遠過梅林而功竝之而予謚賜卹猶復缺如古之人臣有廉其爵貧其身以憂社稷者公蓋其人也公之祠在樂安里諸孫貧甚授書餬口余扁其額曰清忠聊誌仰止之私云

徐文靖公祠在 文廟東祀明詹事府少詹事汧舊在虎邱

西隱山房 本朝康熙二十四年巡撫都御史湯斌建尋廢

四十六年侍講彭定求移建今所以明諸生許琰顧所受祔

潘耒記人之自致不朽者惟此忠孝大節孤行於天地間而善俗維風亦常以勸忠教孝為先務故勝國之忠節往往表章於輿朝若周世宗之旌劉仁瞻宋藝祖之褒韓通明太祖之表余闕竝為贈官立祠而齊高祖救史臣為袁粲立傳元修宋史亦具載文陸諸人蓋忠於所事而殉之以死者人臣之極則褒忠錄節以扶植綱常者古今之通義身沒而名存事久而論定正氣憑焉不可得而磨滅也前明末造朝臣死忠者班班可考而吾吳則官詹勿齋徐公為最著公自為經

生時卽以希聖希賢自淬厲入詞苑爲講官正色立朝風節
 與文文肅姚文毅相上下北都之變公方家居不卽死比聞
 金陵不守指池水謂人曰江萬里吾師也卒自沉以死天下
 稱純臣焉公沒四十餘年而潛菴湯公來撫吾吳爲公建專
 祠於虎邱載在祀典有司春秋致祭崇德報忠甚盛典也而
 有冒宗遺孽竄入其中奸民蠹僧從而誘之遂至毀像撤屋
 盡售諸人翼翼崇祠鞠爲茂草盪蕩無所行路傷嗟於是徐
 之宗老暨郡人士控於前撫宋公下所司勘治會宋公遷去
 未蔽厥辜復控今中丞于公下長邑覆勘甫正厥罰主持其
 事郡紳咸集而侍講彭公有編纂之事於維揚言於銀臺曹公首
 祠之資未辦會彭公有助祠費大半於是郡士夫協力裨補
 捐厚資兼論所屬飲助得祠費大半於是郡士夫協力裨補
 不日落成以虎邱故址頽陷改築於長洲學宮之東偏祠屋
 三楹中奉宮詹公旁以許顧兩文學配許先生玉重間燕京
 之變行哭三日自縊福清觀不死投胥江不死絕粒七日死
 顧先生東湖當金陵變後自經學宮不死復赴水死兩先生
 以布衣諸生而慷慨殉國人尤賢之用配宮詹公忠臣烈士
 參列一堂相視而莫逆同遊而不孤當亦公心之所甚慰也
 宮詹公有子昭法先生亦以清操介節見重於世稱真孝廉
 中丞于公別致褒獎祀諸鄉賢殷禮竝稱聞者莫不興起夫

庠序之設所以明人倫也死忠死孝乃明倫之實事士登膠
 序慮無不懸以爲鵠幸而先正先民有若人焉得不企而慕
 之以爲師表試思六十年前縉紳之居高官髦士之擅時譽
 者不知其幾今皆澌然與草木同腐而宮詹暨兩文學名垂
 史乘節炳日星夫非出自宮墻者哉至性人人本具聖賢人
 人可爲處變處常各有當盡之道母曰俎豆學宮非吾儕事
 其可也彭公素以綱常名教爲己任旣倡修學宮復營斯祠
 發揚潛德表俗坊民之意至深遠矣未少受業於孝廉先生
 備聞世德幸祀典之再光公論之不泯也謹敘述始末而系
 之以銘銘曰國家養士始澤宮釋褐登朝祿彌豐誼當矢報
 安危同末流身家計偏工置君國事如暗蠶脂韋便佞偷自
 容臨難苟免爭趨風峩峩官詹正氣鍾垂紳端笏彤庭中清
 流倚賴推君宗虞淵日墜微垣空痛思攀髯抱遺弓一馬渡
 江不作龍秣陵胥臺烽燹紅擇死得所三閭從沉淵畢命何
 從容許顧兩生僅章縫未沾一命縮半通義憤所激悲填胷
 趨死如歸百折東眇軀擔荷綱常隆聞風愧死長樂翁東吳
 夙稱禮義邦有臣有士如三忠足報國恩十葉濃精爲星芒
 氣成虹雲車風馬時相逢泮池清潔宮崇崇安魂一室昭虔
 恭典廢補闕典至公多士瞻仰資磨礱廉頑立
 儒殊有功人心天心不昧蒙春秋禮祀無終窮

彭侍講祠在 文廟東祀 本朝翰林院侍講定求康熙六十一年建

教諭宅在明倫堂西南

師生員額

宋元明制詳見吳縣學 本朝教諭訓導各一員雍正四年析置元和縣以訓導司元和縣學初廩膳生員二十名增廣生員二十名附學生員不限額文生遇歲科兩試各取二十名雍正三年

詔增五名武生歲科併試取十五名析縣後廩膳生員十名增廣生員十名文生歲科兩試各取十三名武生歲科併試取

八名

學田

宋景定咸淳間知府陳均季鏞撥廢寺沒官田四頃有奇克

學廩

元至元三年郡人陸德原助置田

明成化十年郡人華岳助置習義鄉二十三都九畝田二十

畝吳寬記

萬歷二十五年知縣江盈科置田一頃一十畝

三十六年知縣祁承燠置田五十畝

以上田租歲久籍亡 本朝康熙五十九年布政使楊朝

麟核實在田一十一頃四十三畝七分九釐八毫屬教諭
訓導司出納雍正三年析存田七頃五十四畝三分二釐
九毫

文星閣在縣學東南舊為東禪寺中閣基初明萬歷二十五
年知縣江盈科建閣峙縣學左與右雙浮圖相向盈科題額
曰姑蘇大觀自為記四十年知縣韓原善重建稍移而南即今
所也中為宇五楹以待士之弦誦者崇禎六年知縣涂必泓

修陳仁錫記本朝康熙二年邑人端仁先生吳愉修閣頂建桂

香殿十九年邑人仁簡先生彭瓏建朝元閣時習堂瓏子定
求累有興葺迄四十年始竣事四十九年定求建祠祀瓏愉

及正誼先生宋德宏又以三先生高第弟子侍讀彭寧求清

流知縣湯傳榘寧州知州張孝時旌德教諭張孝揚庶吉士

董麒進士鄭駟耐王喆生記明徐顯卿文星閣記惟王建國

神禾觀厥成迺致郡邑咸各有學顧其所重大都曰孝友光
明可知已逮明興軼前代猗歟盛哉前長洲縣學故在郡城
東北當事者謂二百年來雖科第不乏然而科第不元仕宦
不相卜遷城東南改福寧寺為學宮自嘉靖辛丑迄今六十
年科第仕宦者如故不加盛萬歷己丑侍御李君故長洲令
來按吾蘇加意學校時開府周公精形家言同詣學周遭相
度謂右翼雙浮圖是日文筆左空缺不稱當有所建豎於是
邑侯陳君捐俸築臺屬博士吳君董治之崇二丈餘擬構穹
閣又八年而邑侯江君復捐俸經營請於開府趙公觀察曹
公彭公各檄發贖緩邑博黃君袁君陳君復請予為疏倡諸
縉紳先生各捐金助役鳩工庀材以典史唐惟仁諸生劉仲
領其事數月落成崔嵬摩空金碧陸離如翼如識者謂長
洲學自茲益彬彬盛矣於是邑侯江君邑博黃君袁君陳君
請余為記余聞庠序者禮樂既興之所用非所以興禮樂也

矧乃茲閣當事諸公寧為長洲士科第仕宦計哉科第非人
材不久重人材非科第不驟顯若謂科第為人材是謂庠序
即禮樂也而可乎自古不愧科名者其不科第而擁四海
千秋之名者不乏則科第重乎人材重乎當世重科第士之
巖穴閭巷者立德立言則可其於立功無當也則國家何賴
焉試閱科第題名其功在朝廷望重華夏而村童走卒皆知
其姓名者此人材不愧科第者也其掇巍科歷卿相一時一
鄉非不籍甚或其身尚在或身物未幾身名翳如叩諸博學
多聞文章命世之士而茫然不知為何人不能名其一事之
善者此科第也非人材也科第人材判然若兩物士君子亦
可知所重矣然則當道諸公所為倦倦者作士育材云爾寧
為科第乎哉自有長洲士有如韓襄毅雍孔侍郎鏞者繼踵
則茲閣雖與麒麟凌煙竝峙可也李君名堯民余甲戌分校
禮闈所取士周公名繼趙公名可懷曹公名時聘彭公名國
光邑令陳侯名其志江侯名盈科博士吳君名良治黃君名
承詢袁君名本陳君名朝東茲閣突兀數公麗石不朽矣韓
原善重建文星閣記人文之盛類風氣使然故與為風而又
為天帝司文之府每見形家言文筆宜弭蓋此意也乃茂苑
巖官於右則蠡雙浮屠而左則一望如掌故雖名山大川經
帶包絡說者謂龍遜於虎人傑之不能應地靈也職此之故

聞里父老言舒公建學後嘗議建鐘樓矣而卒難其竟垂數
十年桃源江公來樓果成而前撫臺周公精堪輿親相其地
謂地不叶於與遂指畫樓基而始有更議居亡幾何山陰祁
公至捐俸購民間地鳩工採石學博唐君佐之甫定址而以
遷擢去弗觀厥成庚戌余自由拳來講讀之暇諸生楊時
倬管珍姚希孟朱篁等數為余言之既度其形勢非數千金
不可非主持自兩臺不可非得一任勞怨者為之總攬又非
得一強幹而質實者為之料理不可越壬子橋李魏君至學
政井井而諸生又謂當大比期亟欲修舉為請諸撫臺徐公
按臺房公皆報可又捐金如干而饒臺張公吳縣周公推闡
張公暨闔郡縉紳先生以及士民之好義者樂助各有差其
所不及則余以俸金濟之又不及則以贖銀足之具載董事
邑耆張弘祚工籍班班也余將駕朝車會樓成與諸子登眺
其上則見大江經毘陵而東與太湖三萬六千頃相為灌輸
而七十二峯沉沒其間一抹如黛或束或放若抱若折而入
城也則葑溪迂迴長鬢真如玉帶已而落日流金明霞璀璨
烟嵐吞吐雲物蔽虧縱觀大海之外汪洋洋屬氣結成樓
臺變幻閃倏不可方擬因指眎諸子日月象緯天之文也江
山海嶽地之文也是惟杰哲聚為人其文其人沉深渾厚則其
文如條風是天地之元氣也其人疏曠特達則其文如金風

是天地之清氣也下此則冬夏之風為戾氣寒氣而文始不足言也夫風均出於巽而噓之殊氣若此乃得之為文則遂以殊人又若此始信風不在巽而文不在天譬之斯樓自卑而高自下而上又譬之斯鐘大扣則大鳴小扣則小鳴其摩空響荅非偶然也故蘇文以端風端風以風人人不第藉以取金紫而武緯文經令范文正韓襄毅諸公不獨擅美於前是在諸子是役也勅議於丁未卜地於己酉而庀材則於今壬子夏四月落成於冬十月為基周圍二十丈四尺閣高一十三丈六尺遠可眺三百里閣之中為洪鐘一響可聞千萬戶南向為文星像以奉香火閣南不數武為宇五楹以待諸士之絃誦者顧余以鳩能拮据興數萬人之工舉數千金之費而先後七月得觀落成以去茲歲賢書環閣左右奮起者十人且有以義經魁者余又得觀人文之成以去非藉諸君子之力不及此言念共濟不勝低徊也是不可以不記

朝彭定求文星閣修造記康熙四十二年文星閣修造諸工次第完備定求竭蹶經營歷有二紀追思作者之前勞既荷同人之協力而未遑以時敘述竊恐後之視今蔑由考徵以知所興起也乃總舉而為之記曰文星閣為長洲學宮而建亦名鐘樓前明嘉靖開舒侍御改福寧寺為學議者以兌方浮屠雙峙非英方特聳星峯則形勢不利故建閣最高而舊

基較今稍北萬歷壬子復遷於此經費累千皆出官帑有孤竹韓侯碑記可考也閣既建長洲各賢鼎興若姚文毅文文鍾肅陳文莊徐文靖諸公炳炳麟麟增光桑梓可不謂星文鍾靈之驗歟崇禎癸酉更經葺治拓地以祀建閣首庸有陳文莊公碑記可考也運丁鼎革兵燹震蕩閣為風飄雨漏鳥棲鼠竄委諸荆榛蕪蔓中莫有過而問者吾郡人文零落紳士摧殘亦不勝嗟歎云康熙癸卯吾師敬生吳先生以閣頂久欹始為募修并建書院數楹崇祀文昌顏曰桂香殿栽榆藝桂置田飯僧俾之居守惜字放生月為之會此修造之始也甲寅仲秋定求遇玉局梅梁杜公飛鸞開示謂實宣化於此伏念神之格思符於影形庚申告歸遂祀玉局於殿左尤檢討為之記而庭館未闢步趨偏仄是時遠近人士聞風響臻因於東偏建閣三楹顏曰朝元蓋按天官書斗魁戴匡六星曰文昌宮應有附麗之象焉南又建堂三楹顏曰時習爰明文昌立教羽翼宮墻猶行古者術序遺意然舊閣四重漫漶未治謀諸繆侍講形獨肩厥任暨茨丹獲煥乎更新先君率門弟子數十人月之朔望分題校課數載弗輟相勗以敦實學戒虛聲戊辰閣頂復毀先君亟為募貲歲事而自為之記此修造之續也已先君歿門弟子立祠於西偏修春秋釋菜禮丁丑顧中丞汧又建閣三楹祀漢壽亭侯閣下專祀吳

先生前營精舍而閣頂亦經重修定求復憶吾師疇三宋先生曩者設教城南衣被後學因於先君祠南爲祠繆侍講爲三賢祠記辛巳定求於殿西北隅募建別館便住僧淨修爲未增築門垣改鋪石砌庶幾規模堅久此輔於修造之後者也計自癸卯迄今閣頂之修凡四度屋之建凡四十楹集費廊曲徑環繞周遭嘉樹垂陰清流縈帶眺望則可以共星辰肄習則可以居師友游焉息焉亦可以荅景光陶情性謂非城東一勝地哉或曰書院之設例視學宮何爲乎祀屬文昌若近於道家言非儒者事噫嘻彼特不深察天人之故爾易日觀乎天文以察時變詩曰倬彼雲漢爲章于天聖人神道設教之義明矣圖書之精陰騭之厚必有默司其命者則文昌之不爲虛無竊涉也夫復何疑惟茲地高明爽塏神靈陟降實爲人文萃渙合離之所學者果能常與對越提省此心臨之在上質之在旁則欲消理長足爲砥志修身之所由基如第曰科名炯鑑而已猶是瑣瑣流俗之論也以定求之愚柔無能仰報鴻庥於萬一日月荏苒猶得歸老鄉園晨夕瞻依詎敢隕越以忘所自謹備識原委而申明其說繼長增高無使壞墮尙望後之君子
康熙癸未仲冬陽至日

甫里書院在長洲縣治東初元至順中總管錢光弼因唐陸龜蒙故居奏建書院於甫里元統二年龜蒙裔孫德原移建於郡城而增廣焉有 宣聖燕居殿及龜蒙專祠詳見祠又

闕明倫堂大小學二齋設山長主教事今廢

元柳貫暑中遷寓甫里精舍城

隅亦有果園坊容得閑人借草堂何必樵漁之笠澤故多水石近滄浪過橋稍接魚蝦市泛艇遙連鴈鶩鄉秋雨幾時能破塊夜燈休負讀書牀

平江學舍在舊府治基文二齋齊門義學在石皮街利二齋婁門義學在迎春坊正二齋俱

本朝乾隆八年知府覺羅雅爾哈善建

元和縣學附長洲縣學

先師廟

崇聖祠

名宦祠

鄉賢祠

忠義孝弟祠

以上竝見長洲縣學

餘新分縣同

訓導宅在 文廟東

師生員額

雍正三年以長洲縣學訓導為元和縣學訓導廩膳生員十名增廣生員十名附學生員不限額文生遇歲科兩試各取

十二名武生歲科併試取七名

學田

雍正三年析長洲縣學田三頃八十九畝四分六釐九毫屬元和縣學訓導司出納

和靖書院在虎邱雲巖寺西宋和靖先生尹肅公焯於紹興間讀書虎邱西菴題其齋曰三畏嘉定七年知府陳芾度西菴隙地建祠祀之詳見祠端平閒提舉曹幽請卽其地為書院以和靖為額建三省務本朋來時習四齋後提舉馬述又建君子堂嘉熙四年提舉陳振孫建藏書堂咸淳初提舉李芾建燕居堂以奉 先聖元初為寺僧所據延祐元年移置

長洲縣治東烏鵲橋北

王志宋常平提舉司故址

至元中總管道童建殿

廡門堂後廢明嘉靖二年知府胡纘宗以龍興寺廢基改復

書院今廢

宋劉宰重建和靖書院記秘書丞永嘉曹君提舉

阜通之理而公私有裕又持受輸之平而輸者說申義役之勤而役者安既田里晏然臺無留事一日領客登虎邱致敬於先正和靖先生尹公焯祠下慨然有懷以為方紹興五六年間中原震蕩南土未安內之所急者惟幄決勝之謀外之所急者奔走禦侮之力先生惓然一老漂泊蜀中猶一鳧之飛於江湖何算而我高宗一聞侍臣之舉求之惟恐不及慮其出之難既飭官司具禮以勸行金逋絡繹於中塗虜使肅迎於候館脩門未入而列之經筵講席未溫而陞至禁從禮貌之隆冠絕當代我高宗之意夫豈徒哉二老歸而周興四皓來而漢定天命人心之去留固有非人力之能與者異時經筵密勿志意交孚危微精一之旨既有以續堯舜禹湯文武六七聖人之傳緝熙光明之學又有以垂我宋聖子神孫億萬斯年之盛皇乎休哉初先生退自經筵來館於此猶榜曰三畏齋其持敬不倦如此後以其壻居會稽迎以就養歿

葬其地嘉定中郡守陳君芾始因郡人黃士毅等請即三畏齋之舊繪像建祠君以為貌象之有嚴雖有慰典型之仰而佩衿之益遠寧能無城闕之嗟擬計積累之贏畧倣先朝四書院之制立祠築室以舍學者買田收穀以食之而儲書其中庶履其地必思其人誦其書必求其旨事方權輿而知府事真寧張嗣古提點刑獄前使者浚儀趙君立夫後使者南豐曾君穎秀復從旁與之且各捐資以助由是材不靳直工不靳庸指期而成不愆於素繼自今朋簪日盍戶屢日滿有學問思辨之益無孤陋寡聞之蔽斯文未喪於此有觀焉既成而屬余以記余方病吳人逃於佛而不知返以為曹君此舉不惟有以光昭我高宗皇帝之聖德抑有以美教化移風俗不孤使者之職故不辭而為之書時端平乙未八月元鄭元祐重建和靖書院記宋禮部侍郎和靖先生河南尹公紹興七年用崇政殿說書召遄奉外祠居吳虎邱先生歿七十有五年吳守陳君芾乃始繪像建祠而勉齋先生黃公幹為之記端平間提舉常平曹君幽請於朝易祠為書院乃始買田為經久計江南內附書院奪於僧有司以尊前賢勵後學不可泯泯遂已也於是以前治東南陬故宋檢法廳事基常平提幹廳事基大德十一年山長王達即檢法廳基建大成殿前無門徑旁無兩廡後雖克復故址而仍就簡陋士蓋病

焉元統二年新安吳晞顏來為山長剔蠹弊擢浮濫積力稍久有志重建然猶思或中阻於是請於大府時中書左丞耿公督餉吳下聞而善之公既被召復請於張侯某侯入為吏部尚書今郡守道童公廉公剛明治稱第一晞顏請新書院公曰治不本於學豈稽古崇德之謂哉即選從事某董程役而籍書院粒米之在廩糶之得中統鈔八千六百貫輦大成殿即新址而前為儀門門少西為先生祠又西為土祠又西臨廣衢為外門翼殿為兩廡殿後習堂堂東齋廬曰六有總為屋若干楹其即工始於夏六月甫冬蓋十月而書院落成初先生卒於越越亦有先生書院先是晞顏嘗為越之書院長亦既盡瘁完葺及今再調而入吳故晞顏每太息曰先生學繼濂洛道被海宇其大者斷不繫於一祠宇之興墜然已何幸而一再獲長先生祠下哉既不佞無以紹隆斯道之統緒若區區祠宇而復不能殫盡心力則豈承學小子之謂哉斯其志有可尚者已若夫先生師友淵源出處大致皆具於勉齋先生記茲不敢瀆而槩言其修建始末云

葑門義學在利三畝 本朝乾隆八年知府覺羅雅爾哈善建

崑山縣學在縣治西南唐有文宣王廟廟堂後有學室在縣治

東即今察院故常平倉基以兵火廢大歷九年縣令王綱始建學於廟

垣之右設博士訓生徒五代廟毀宋雍熙四年縣令邊倣因

舊址重建廟堂門闕甚麗元豐四年為風潮所壞元祐初知

縣杜采移建今地作廟堂齋廡公廨庖廩凡四十楹紹興二

十八年知縣程沂闢廣垣墻重築外門殿堂齋廡悉修完之

知府蔣璨名講堂曰致道乾道元年知縣李結修范成象記淳熙

間知縣葉子強周承勛紹熙間知縣李稠相繼修慶元五年

知縣章萬里修改致道堂曰明倫嘉定間知縣巫似修重建

大成殿淳祐間知縣徐聞詩修知縣袁璵建直舍齋六日居

仁由義教忠履信致道成德元至元開典教王夢聲修元貞
 二年陞為州學延祐元年州移太倉二年知州王安貞建學
 於州之北學道書院山長王大年處州路儒學教授杜頤直
 學陶公甫學賓陶正甫助成之龔肅記至正九年知州史文彬
 新之李祁記十七年州復舊知州費復初仍建於此明洪武二
 年復為縣學定東西兩齋曰居仁由義闢射圃建觀德亭宣
 德初同知張徽移建大門於戟門外教諭曹昇修戟門正統
 初知縣羅永年修兩廡景泰元年知縣吳昭改建大成殿二
 年增建號舍於學門外東成化十九年巡按御史張淮構地
 拓基創新易敞通為屋一百三十九楹垣二百三十丈弘治

五年知縣楊子器建尊經閣隆慶六年知縣申思科環泮池
 為石闌石墻萬歷三年思科請於巡按御史邵陞出贖緩重
 修殿堂齋廡增築殿前露臺陳允升記崇禎十三年知縣葉培恕
 教諭呂兆龍訓導張鵬翼周秉緒修顧錫疇記
 本朝順治十五年提學僉事張能麟修自為記康熙十一年提學
 僉事簡上倡修大成殿二十一年教諭張其翰修提學僉事
 趙崙邑人尙書徐乾學等皆有助三十年邑人編修王喆生
 倡修啟聖祠濬泮池自為記雍正三年析置新陽縣遂為崑山
 新陽二縣學十一年邑人顧登修尊經閣提學侍郎張廷璐記十二年
 教諭劉方沛率邑人唐德宜等重修大成殿明倫堂及居仁

由義二齋 唐梁肅學記學之制與政損益故學舉則道舉政
 堂之後有學室中年兵僅存臻堂宇大壞方郡縣多故未遑
 繕完其後長民者或因而葺之以民尚未泰故講習之事設
 而不備大歷九年太原王綱以大理司直兼縣令既釋奠於
 廟退而歎曰夫化民成俗以學為本是而不崇何政之為乃
 諭三老主吏整序民飾班事大啟室於廟垣之右聚五經於
 其間以邑人沈嗣宗躬履經學俾為博士於是遐邇學徒或
 童或冠不名而至如歸市焉公聽治之暇則往數大猷以聳
 之博考明德以翼之優而柔之使自求之揭而厲之使自趨
 之故民見德而興行始於鄉黨洽於四境父篤其子兄勉其
 弟有不被儒服而行莫不恥焉僉曰公主於設教嚮其末不
 墜其本易其俗不失其宜也傳曰本立而道生昔崔瑗有南
 陽文學志王粲有荊州文學志皆表儒訓以著不朽遂繼其
 流為縣學記俾來者知我邑經藝文教之所以興是歲龍集
 乙卯公為縣之明年也宋王禹偁修學記夫聖人之生必受
 天命有位者天使之化民為一時也三五帝王之謂乎無位
 者天使之立教為萬世也先師夫子之謂乎是以窮於旅人
 終於陪臣非不幸也向使居帝王之位行堯舜之風則顏閔
 之科猶元凱之舉也兩觀之誅猶四凶之罪也自然道至而

我無為化行而人不知時之謬者必曰何力之有後之美者
 必曰無得而稱也雖流為典謨形乎簡冊亦不過濬哲文明
 温恭允塞而已豈復有祖述憲章之道流於後代乎故曰生
 民以來未有如夫子者也秉筆之士安得輕議其德業歟吳
 之諸郡姑蘇稱其尊郡之屬邑崑山出其右雜以漁鹽之利
 漑乎朝夕之潮昔在皇唐是為各邑降及錢氏茲惟上腴距
 海之田民斯阜矣然而庠序或缺儒素弗興實倉廩而禮節
 未知既富庶而教化不至為邑之長得無咎乎縣大夫邊公
 世為儒流時號甲族自起家之調歷宰邑之資所在播其能
 名儕類驚其久次大來之望固未易知皇上嗣位之明年淮
 海王如京師且獻圖籍尊王室也主上思泰遠人精擇循吏
 銅墨之任尤難其才始得公以宰吳吳民受賜降璽書以勞
 之旌善政也秩滿受代將選於天官會茲邑有令尹之乏者
 二千石命公以承之且敘政績聞諸冕旒未幾有即真之命
 免常調也公因民所利期月而治以為人者教之本儒者教
 之先苟非師嚴而道尊焉可移風而易俗哉先是文宣王廟
 但有基址盡為蕪蕪廢而不修六十年矣公乃出俸金以營
 之同僚悅隨羣吏弗違乃庀工徒乃度材用一畝之宮圖蔓
 以出之數仞之牆樹土而揭之殿堂既嚴門闕斯備麗以丹
 漆飾以巧塼制度合乎禮文力役當乎農隙乃像素王被華

袞垂珠旒王者之制彰矣乃狀十哲冠章甫衣縫掖儒者之
 服備矣廟之興也既如彼像之設也又如此粵上丁之晨行
 釋奠之禮所以列豆籩陳簋簠潔牲牢具鬯洗費幣有數尸
 祝有辭八音作而人和三獻終而神悅禮無違者道不虛行
 觀之如堵墻化之猶影隨豆之事修矣禮樂之道興矣十
 室之邑期忠信以如聖一變之風闡詩書而及魯議者曰吳
 地祿國也崑山海隅也舊榮霸俗未行儒風非明君以文德
 敷萬邦非賢宰以儒術化百里又安能遵先王之教移小國
 之風者哉禹偁幸忝德隣熟聞異政爰旌茂績俾述斯文難
 言雖在於聖門不朽願刊於貞石張九成重修學記通直郎
 知平江府崑山縣事程公沂詠之文簡公之曾孫伊川先生
 之姪孫也紹興二十八年七月十二日作書抵余曰沂聞為
 政莫先於教化教化莫先於興學吾邑有學卑陋不治甚不
 稱朝廷所以尊儒重道之意學門之外有社壇齋廳掩蔽於
 前氣象不舒沂乃移於社壇之西闢其門墻廣袤十餘丈又
 以東隅建學外門週植槐柳增崇殿門營治齋宇氣象宏偉
 殿堂齋廡鼎鼎一新遇月旦則率縣官詣學請主學者分講
 六經與諸生環坐堂上以聽焉時知府事待制蔣公名其堂
 曰致道并書學榜以寵賁之嗚呼可謂盛矣又曰先生昔學
 於大儒其所見聞非俗儒比願以其所聞者明告於我我將

有以大之余曰吾老矣久抱未疾舊學荒落顧何以副子之
 請雖然不可以虛辱也輒以聞於師者以告左右左右其擇
 焉竊嘗以謂學者當以孔子為師以孔子為師當學孔子之
 學孔子之學非為博物洽聞絺章績句高自標置視四海為
 無人攘臂而言曰吾仕宦當至將相吾富貴當歸故鄉吾當
 記三篋於渡河賦萬言於倚馬此正俗儒之學孔子之學乃
 不如是當熟誦孔子若聖與仁則吾豈敢之說子夏鞠溜播
 洒之說孟子徐行後長者之說以求孔子之心可也是謂孔
 子之學若乃學如馬融如陸淳博如許敬宗文如班固如柳
 子厚亦可矣而依梁冀而助武氏而事竇憲而附王叔文此
 吾儕之所羞道而孔門之罪人也詠之以為如何如其不然
 當明以教我莫子純修學記壯哉崑山之為縣也摻結峻絕
 白石如玉沃野墳腴稻油油控江帶湖與海通波山川孕
 靈人物魁殊則所謂玉人生此山亦傳此名著於荆國文
 正公之詠豈徒竦榮於往號抑亦延光於將來也洪惟我朝
 用儒立國考辟雍泮宮之制京師郡國皆立學飾祠廟以奉
 先聖闢黌宇以育多士崇稽古之洪道茂長世之善經由是
 文治勃興炳然與三代同風猶慮湛恩未廣聲教之未洽也
 申命縣司更置學麗先聖廟如郡國之制景祐四年之詔也
 嘉猷四塞六合時雍沐浴膏澤漸潤德教祁祁生徒濟濟儒

學校二

術而崑山世載其美焉藻揆天庭冠四海而首雋折瓊枝而繼佩固眾芳之所在也日引月長鮮克修事夏弦春誦家自為學先聖之居亦窘風雨朝奉郎知縣事章君萬里大思不任以墜教基授模梓匠夙嚴神棲飾南端之特闢立應門之將將華觀雙邈采題交輝乃營新堂乃恢廊廡浚以玉甃繚以崇垣奢未及侈規遵王度是以經始勿亟成之不日庀工於慶元五年六月而以八月畢之於顯新宮既閱且康思欲復之而無數申之而有裕也於是捐供給贏貲斥圭租之美價易民田幾二頃括奸民隱占之田益三頃民之訟田法當沒入者復益其二頃响响苗既夷且大俾其儲積供久而可繼也又為之新館舍之器用潔祭祀之籩豆亦衣布之餘財而非重費於公也既壯其室亦豐其儀躬率諸生行釋菜禮告奠於聖靈昭事是肅敬謹威儀示民不佻煌煌乎茲文容之壯觀而王制之鉅麗也而後乃知流大宋之德馨咸在於此仁風行而四達義方敷而遐驚聲名布濩溢浹邑區非言厚行陶化染學昭光振耀立事立功效當年之用以對前修之純淑則岷風穴水不特清越餘馨而已宜伐石以志使是道也不替於後章君以子純嘗參吳門之幕乃列其事來告俾書之元楊維楨修學碑崑山在唐為望縣國朝以生齒之庶升州徙治東倉至正丙申海寇毀東倉州復舊治所招

還流民重立官寺及社稷之壇宓羲神農黃帝之廟至是遂大修孔子廟殿之址拓其舊三之一禮殿倫堂重門廣庶齋廬直舍庫庖庑無不畢具又為堂以祀先賢鑿池倫堂前以泮制象設先聖先師繪從祀諸賢范祭器理大成樂無不如法實今費侯為政三年之所成也民之居者知有教士之歸者知有養又侯之仁民禮士一出於誠之所致也役始至正二十年夏四月竣事於明年十二月侯既率文武僚友將吏儒生講舍菜禮先聖先師舍菜告成又命職於校者具書幣狀顛末走二百里外謁余文以志余方悼世變之劇州縣鞠為荆棘雖鄒魯地不免矧阻江要海與寇爭尺寸者哉訖能保障其所如金湯帡幪其居廬校室如安堵之故非其人傳曰守令者民之師帥也侯非師帥之殊尤者乎抑聞治暇即過黌舍與為弟子師者辨討各理扶植綱常切切然恐不及人嗚呼人之所以為人國之所以為國者綱常也敘焉斯治敦焉斯亂世降道微邪說暴行滿天下馴致三綱淪九法斃人類無以別禽獸然理出於天者未嘗一息而可滅余讀孟子書知先王學校之可美矣其言曰三代之學皆所以明人倫也時方崇功利薄仁義則又告之曰未有仁而遺其親義而後其君者推其效可使制梃以撻秦楚堅甲利兵人心

天理之足恃也如此詩曰既作泮宮淮夷攸從又曰在泮獻
 馘在泮獻功又知古者文武非兩岐也侯於用武之秋不敢
 斯須忘文教是可書已侯名復初字克明東平壽張人世長
 千夫於鎮江蓋有文武才幹者是役也同知州事海陵梅英
 實贊其成事判官齊陽教授陶植提控案牘陳善都目沈繼
 祖謝宏道也詩曰維吳支邑崑在北東東薄於海捍海作邦
 陵谷以變井邑以遷人民雞犬往而復還邑有庠序鞠為草
 莽治必有教復我鬻宇展也費侯克帥克師文事武事匪曰
 兩岐在昔受成獻功馘我教既成我戰必克化民服敵孰
 負孰荷侯曰噫嘻豈不在我我部百里我心一家衣冠儼雅
 籩豆靜嘉天經不斲國紀攸敘如子從父如弟聽傳維崑有
 石維石有銘銘以著績適觀厥成明謝遷修學記崑山縣學
 在城之西南本宋元以來故址國朝正統景泰閒知縣吳昭
 嘗改建焉殿堂齋舍咸具歷歲既久頽弊滋甚有司者未之
 能新也成化癸卯今副都御史襄城張公淮時以監察御史
 按歷茲邑見而歎曰是而不為將安為乎適縣無長吏即命
 府判沔陽邵福春陵李智董其事鳩工市材購隣地以拓其
 基創新易弊增隘就廣辨方正位期年而落成其重門大庭
 巍然學宮之前者曰大成殿殿之旁兩廡列焉堂有三曰明
 倫曰育賢曰退省齋有二曰居仁曰由義設門於退省堂之

前曰自修築亭於射圃之上曰觀德而凡鄉賢之祠師生之
 舍庖廩之次罔不完且美焉蓋為屋以楹計者百三十有九
 垣以丈計者二百三十至於籩豆簠簋之屬亦考博古圖式
 參以今制更造二百四十餘器當時未有記其事者頃巡撫
 都御史四明朱公瑄行部至崑周覽庠舍而歎張公之功有
 不容泯焉無傳者於是知縣張侯稟適以考績來京遂承朱
 公之命請予文以記之予惟自古帝王之理天下莫不以求
 賢為務然不先養士而能得賢者未之有也學校者士之所
 居以業其業者也語曰百工居肆以成其事士無可居之地
 而能致力於學者鮮矣又焉得賢才以為國家用有能作興
 學校如張公者厥功不已多乎崑山為姑蘇鉅邑素稱文獻
 賢才輩出代不乏人載之簡籍班班可考其尤著者理學如
 李衡志節如范成大勲業如衛涇皆一時之傑士生斯地嚮
 方樂學有由然矣矧又有為之作興者哉固宜奮迅激昂十
 倍於尋常也然學之道奈何曰是不難知也今夫室必有扁
 勸戒存焉諸生藏修息游朝斯暮斯顧其名而思其義接乎
 目而警乎心登明倫之堂則思吾之倫果能明矣乎入居仁
 由義之齋則思吾之仁果能居義果能由矣乎踵自修之門
 則惕然曰身其有未修耶憩觀德之亭則瞿然曰德其有未
 成耶動靜語默不愧乎退省之私切磋琢磨不負乎育賢之

意用是而日勉焉以古之聖賢與鄉先達自期待雖所至不能盡同要之皆實學也外此而為學則非吾之所知也已予既述其事之始末并以是為諸生勵云

先師廟

崇聖祠

名宦祠在明倫堂東祀唐縣令王綱宋知縣邊倣張方平韓正彥陳邠程沂李結葉子強潘友文巫似修潘彙征項公澤林桂發主簿邱與權陳璧吳堅元達魯花赤孛羅帖木爾縣尹潘昂霄知州王安貞李用璋史文彬偃侯斯費復初學正王夢聲州判姜復昌郜肅徐石麟明知縣芮翀馬文炯羅永年鄭達唐素楊謚余機楊子器方豪施德楨祝乾壽彭富王

用章聶雲翰樊玉衝陳祖苞教授朱冕教諭沈應奎荆懋功洪應紹季箎訓導張汝才堵應畿縣丞金華石肯構李三省典史韶護

本朝知縣郭文雄仇士俊高鈐

鄉賢祠在明倫堂西祀唐陸龜蒙宋王葆李衡范成大陳振吳仁傑衛涇衛湜明殷奎王英朱吉龔詡呂旦吳凱張和葉盛龔理沈魯沈訥鄭文康沈誠孫瓊沈祥梁昱吳瑞虞臣朱棻吳愈朱夏朱機盛洪王秩顧恂張安甫沈時周倫顧鼎臣周冕顧潛周廣魏校周鳳鳴周在周復俊王任用王同祖孫雲張憲臣張棟諸壽賢徐申歸有光許承周李同芳朱熙洽

馬玉麟徐應聘王煥王臨亨顧天竣支如璋柴大履陳嘉猷
 歸子慕鄭若曾周之甫顧夢羽顧謙服顧允元張振德王燾
 葛應元葛錫璠蔡懋德王志堅何琪枝張志美張魯唯陳延
 經陳其柱朱日燦王志長王志慶何天衢許觀吉夏縉顧夔
 許士翀葛鼎

本朝徐開遠邱鍾仁何訥盛符升馬鳴鑾徐乾學徐秉義徐元
 文葉方藹徐樹本王浦珍康熙五十六年布政使楊朝麟增
 祀唐張鎰宋王綢孫載龔明之元干文傳秦玉明呂昭劉璉
 王永和張穆陸欽夏璣陸容姜昂王倬毛澄朱希周方鵬柴
 奇顧邦石方鳳顧夢圭陸冕朱觀朱鰲周大禮王三接李憲
 卿顧章志王執禮支可大顧大敘王安鼎陳岳如顧天寵朱
 國輔顧錫疇張大復夏萬亨顧咸正胡甲桂顧咸建陳用極
 朱集璜陶琰朱用純

按舊有尊道祠宋淳祐十二年攝縣事吳堅建初名六先
 生祠祀周子敦頤程子顥程子頤張子載朱子熹張栻咸
 淳中知縣林桂發改名尊道增祀邵雍司馬光呂祖謙貴
 德祠亦堅建初名先賢祠祀唐陸龜蒙宋張方平范仲淹
 李衡桂發改名貴德移張方平於守令祠增祀范成大衛
 涇陳振賢守令祠宋建舊志開禧中建誤祀郡守黃萬石知縣張
 方平葉子強潘友文後增祀知縣巫似修項公澤林桂發

今竝廢

忠義孝悌祠在明倫堂西雍正元年

詔建祀漢卞崇唐張鑑宋孫察曹椿年榮生張某元葉秀實明
王永和龔詡陳淮張振德顧天敘蔡懋德王燾顧咸建夏萬
亨胡甲桂顧錫疇俞敬徐協祥李文詠沈楠黃守道周文鼎
本朝王迪惠汪宗灝顧存儒朱鳳徐麟吳聲九嚴漢鉦

按舊有祠祀明知縣巫似修今廢

堵公祠在明倫堂西祀明訓導應畿

教諭宅在明倫堂後

師生員額

唐設博士宋制詳見吳縣學元置學正升州改教授增訓導
至四員明復爲縣制詳見吳縣學 本朝教諭訓導各一員
雍正三年析置新陽縣以訓導司新陽縣學初廩膳生員二
十名增廣生員二十名附學生員不限額文生遇歲科兩試
各取二十名雍正三年奉

詔加增五名武生歲科併試取十五名析縣後廩膳生員十名
增廣生員十名文生歲科兩試各取十二名武生歲科併試
取七名

學田

宋乾道初知縣李結籍僧田撥入學

慶元六年知縣章萬里助置田二頃括隱占田三頃撥沒官

田二頃

紹定四年知府鄒應博助置積善等鄉田六十九畝有奇鄭

記縣有學學有廩教而養之上之加惠於士者厚矣故學校
不修則春誦夏弦之習廢廩粟不繼則朝糞暮鹽之歎興二
者常相須而不可缺一也吾鄉之學安於卑陋者垂百年嘉
定辛巳知縣巫君似修始撤而新之闕麗雄深十倍疇昔瑞
守陳公寺丞嘗欲涉筆登載而弗果然是舉也役鉅而用繁
故於學田未暇增益經費之外所餘無幾由是食鼓聲沉書
燈焰熄朔旦則見大夫凡有職掌之事再拜於庭一揖於堂
而退養既不瞻教安所施若是又十餘年紹定辛卯戶部直
秘閣鄒公被君相簡知來牧吳郡公淳儒也其為政似陽城
其好善似樂克其興起學校似文翁粵自下車未遑他務事
關教養知無不為始於泮宮均逮屬邑捐金殖產高下有差
明年秋以二百萬錢俾邑士陳九臯經理其事得積善等鄉
田六十九畝三角十四步歲租八十九石九斗有奇故額幾
稱畫以禪簞豆之費夜以給膏油之需公之推廣上恩作成

士類抑何詳且悉也公之言曰吾之田非以不義得也蓋欲
學得有義之租而人得有義之供也公於一政事一念慮之
閒舉不違乎義義之為用何如哉嗚呼一介不取諸人伊尹
之義也萬鍾何加於我孟軻之義也伊尹孟軻出處雖異而
所以為義則同士能充此不以窮達得喪亂其所為則亦何
往而非義乎此公之盛心士之所當拳拳服膺而弗失者也
一日學實何且直學陸震持郡符踵門而告曰新租之增為
賜侈矣是宜刻石以壽其傳盍為我記之嗟夫道古今譽盛
德文士之職也顧衰遲廢學詎能著文獨念丙辰叨末第實
為公兄尚書公榜下士又安敢以不文為辭抑聞之化民成
俗學之所由設也理財正辭義之所從出也是故養士而無
其財則非所以為學取民而無其制則非所以為義今之所
與共理者惟要途是趨惟捷徑是圖知己而已於學乎何有
逞鞭扑之威急征斂之期知利而已於義乎何有其間崇儒
向道畏清議而恤游談號稱留意學校者不為無人要亦不
過哀科罰之貲括簿錄之產僅僅為一州計而已有德於屬
邑何有公則不然寬以愛民而無纖芥之過取也儉以節用
而無秋毫之妄費也好清靜而游觀之弗事也薄滋味而廚
傳之弗飾也故能因常賦益常產以培養士之基內而一州
外而六邑廩無不義之粟學無不養之士峩冠博帶日涵泳

於恩波教雨之中公之有功於學校其可淺近論哉雖然飽食終日無所用心聖人所深戒既養之矣教之固不容緩也魯侯戾止在泮飲酒茲不曰養乎載色載笑匪怒伊教茲不曰教乎既飲食之又載教之而使人有士君子之器斯可矣夫豈徒舖啜哉昔昌黎韓愈有言莫爲之先雖美而弗彰莫爲之後雖盛而弗傳今賢侯置有義之租爲有義之供以養屬邑之士不能日趨下風奉承色笑則所謂教非賢宰之事歟宰家世三魁以儒術飾吏必能昭明而闡之訓導旌秀士而表率藏修息游金鑄而玉成之美之彰於先者無窮而盛之傳於後者亦無窮矣他日公坐廟堂庇天下之士而究其所施士由庠序觀天子之光以行其所學則教養之功作成之效豈直一州六邑而已哉士乎士乎可不知所以自勉乎若夫名遂身榮志得意滿食前方丈而弗念壘鹽之憂棄墻角之短檠而遽忘絃誦之樂是之謂徇利而違義非公之所望於士者也尙相與戒之

元延祐元年知州王安貞置田一十頃有奇

明嘉靖四十年知縣張焯撥沒官田五頃邑人副使孫雲助

置田一頃

本朝雍正十三年邑人顧璿助置田三頃

以上田租歲久籍亡 本朝康熙五十九年布政使楊朝

麟核實在田七頃四十一畝五分四釐三毫屬教諭訓導

司出納雍正十三年增三頃今析存五頃二十一畝五分

八釐六毫

石湖書院

明改巡撫行臺見官署

玉峯書院在馬鞍山南麓宋衛涇藏修於此元趙孟頫書額

新陽縣學附崑山縣學

訓導宅在明倫堂西

師生員額

雍正三年以崑山縣學訓導為新陽縣學訓導廩膳生員十名增廣生員十名附學生員不限額文生遇歲科兩試各取十三名武生歲科併試取八名

學田

雍正三年析崑山縣學田及十三年析增新助置田共五頃十九畝九分五釐七毫屬新陽縣學訓導司出納

常熟縣學在縣治南稍東二百步前臨運河

王志河東西俱通湖朝夕到學門

舊有文宣王廟在縣東五十步學之剏始莫考僅有屋梁題至和紀年蓋宋仁宗時云淳熙十年知縣曾榮增葺建堂曰

進學紹熙五年知縣葉知幾改名明倫立九齋曰崇德時習

好謀朋來利仁隆禮育英守卓隆德尋又改四齋為尙志尙

德尙賢尙文開禧三年知縣葉凱修端平二年知縣王爚倣

郡庠制重建東為廟西為學扁其堂曰明德六齋曰志道據

德依仁游藝以館士稽古

儲祭服祭器官書

象賢

為小學教言氏子孫

總百二

十楹元元貞二年升州學至元皇慶間邑人楊伯麟曹南金

輸貲修整後至元二十二年知州盧鎮築石堤學宮南樹牆

七尺修三十丈加飾廟宇明洪武二年復為縣學八年闢射

圃建觀德亭宣德九年教諭羅汝寬縣丞李子廉主簿郭南

重修正統元年南知縣事建石梁於泮池上復拓明倫堂基

重新之二年知府況鍾修兩齋後南又市學左右民地徙射

圃觀德亭於左弘治間圃凡再徙嘉靖初徙學道書院舊址在學之西萬曆初徙虞山東麓建官

解饌堂於西北餘東南隙地為蔬畦建尊經閣教諭趙永言

縣丞陳澄佐成之成化二年知縣甘澤修廟學建禮門三楹

徐有貞記弘治間知縣黃慶祝獻相繼修增建東西號舍八年巡

按御史劉廷瓚修學士李傑記十三年知縣楊子器重修楊守嘉附記

靖三十四年縣丞鈕緯修知縣王鈇記三十七年巡按御史尙維

持重修瞿景淳沈應魁記萬曆二十四年西舍火知縣何節教諭許

成器重建兩廊號舍三十七年知縣楊漣修復大成樂顧憲成記

本朝順治二年提學僉事張能麟修自為記康熙四年里民孫德

基輸地重築萬仞宮牆六年布政使佟彭年副使盧紘修尊

經閣魯超記十八年副使劉鼎知縣林象祖修廟殿二十五年

知縣楊振藻教諭程孟訓導張銓重建明倫堂四十四年邑

人山東巡撫都御史蔣陳錫重修尊經閣雍正三年析置昭

文縣遂為常熟昭文二縣學乾隆三年副使姚孔鈞增修樂

器七年副使李學裕重建櫺星門宋魏了翁學記常熟縣學之始圖乘放失僅有屋梁

書至和記年餘無所考慶元三年縣令孫應時以言游里人也始祀於學新安朱子既為證其事寶慶元年祠遷於學之

左而孔堂闕壞弗不加治今令會稽王煥始至大懼無以崇化善俗約縮浮蠹踰年更而正之屬邑士胡洽胡淳董其役

以孔廟居左廟之南為大門北為言游之祠又東北為本朝周子張子二程子朱文公張宣公之祠以明倫居右東西為

齋廬四以館士為塾二東以儲書凡祭器祭服藏焉西以居言氏之裔通為屋一百有二十楹而為垣以宮之且增田四

百畝有奇歲助公養之費凡言氏之裔官為衣食而延師以
 教之別為田五百畝以給其費白於郡於部使者為廩以貯
 之經始於端平之二年之冬竣事於明年之秋迺八月丁亥
 釋奠於新宮屬郡人葉輔之敘其役以求記於了翁竊惟朱
 子嘗記子游之祠矣如魯論所載二三事皆發揮無餘藐茲
 孤陋安敢復措一辭然嘗讀禮書而竊有見焉因記廟學之
 成併附其說夫檀弓不知何人所作而一篇之書獨於子游
 極其稱譽雖於孔門諸子率多譏評又以言曾並列其是言
 而非曾者非一幾若偏於抑揚然即其書以考之大抵當典
 禮誰闕無所考訂之時人之有疑弗決者以質諸子游故前
 後典禮所關者十有四皆以游一言為可否亦足以見其為
 時人之耳目雖汰哉叔氏一語若譏之而實尊之然則游以
 習禮列於文學茲其為文為學蓋三代典章之遺賴游以有
 存者嗚呼信其為豪傑之士矣昔柳宗元謂論語所載弟子
 必以字惟曾子有子不字遂謂是書出於曾門蓋字與子皆
 得兼稱如門人之於孔子進而稱子不稱子退而稱仲尼不
 言子其次亦有既子且字如閔子之等不一二人或子或字
 者又數人然淵弓至游夏最號高弟子而不能子也有子曾
 子子而不能字也就二者而論則字為尊蓋子雖有師道之
 稱係于氏者不過男子之美稱耳故孝經字仲尼而子曾子

禮運字仲尼而名言偃至於子思字其祖孟子字其師之祖
 相傳至今人之字仲尼者無敢以為疑仲尼作春秋二百四
 十二年間字而不名者僅十有二人而游夏諸子之門人亦
 各字其師相承至於漢初猶未敢輕以字許之即是而觀則
 子游以勾吳孤遠之士遂得字而不子以列於高弟之目此
 又豈易易然者今吳門密邇行都而常熟為壯縣有如游之
 北學洙泗遂以習禮輩行顏閔寥寥千載間豈終無其人耶
 或者狃於習俗未有以自振我朱子既嘗表其事以風厲之
 子又何言獨惟山川風氣古今猶夫人也誦先聖之書服先
 賢之訓嗚呼其必有聞風興起以無負建學尊賢之意者士
 其勉之元陳基修學記常熟儒學宋端平初縣令王煥實重
 修焉距今若干歲而常熟升縣為州又若干年矣至元皇慶
 間州人楊伯麟楊應鳳曹南金等嘗一再力新之自是又若
 千年至元十九年教諭天台陳聚以教養餘力節縮眾費即
 其弊蠹者而繕且葺焉越三年今守禦元帥兼知州事海陽
 盧侯名鎮視事之日即謁先聖先賢環瞻廟學思有以振其
 廢墜方是時兵興民困侯知其不堪命乃呼戲下而謂之曰
 吾與若屬扞茲土方面將相不以吾為不肖辱委之民社而
 民社所先者曰學校吾將用若屬力斯事其無乃以吾為厲
 己乎皆曰斯盛舉也敢不惟命於是輸材運篋執斧操耒者

蘇州府志 卷一 學校二

奔走後先惟侯所欲為凡前人之所以葺而不能不圮闕與未及修而在所不能容己者宜其急緩而次第之內而禮殿講堂旁而兩廡齋舍外而櫺星門學門戟門與夫丹陽公泊后土之有祠三賢之有堂采芹之有亭小大畢舉又新築石堤於學宮之南樹牆七尺修三十丈用錢若干緡皆捐已俸而廩無所與庀役若干工悉給軍伍而民不擾工既訖侯率同僚以時廟謁獻饗有容師弟子員教養有所士民具瞻成日始笑將兵泚州守城以衛吾父兄今領邦伯又飾學宮以淑吾子弟侯有德於吾州甚厚蓋有紀述以圖不朽乎教授于德潛率執事者伐石來謁文為記竊嘗觀春秋之法常事不書非常事而後大書特書屢不一書之常熟在古為要荒之地在春秋為子游之鄉在今為吳之北藩自郡縣通祀孔子而常熟之廟學自宋端平迄今凡幾修矣承平之日海內晏安民無戰鬪之虞邑無桴鼓之警縉紳君子仕文學之里役易使之民其視今日不同矣及天下兵興所在城邑為墟生民淪胥水火其視今日不免者不為魚肉幸矣何暇恤夫學校之廢興為哉侯起於武弁身擐甲胄手執干戈戮力攻戰繕完城堡為國藩屏此其職也至於學校承平大夫尙或有所不暇而侯於多事之秋乃能不煩學官不勤民庶親率師徒致力於此而完且速豈非所當書者乎吾聞州之民有利學

田而奪之者聞侯之風其必有與感者焉其正其疆界謹其出納使祭祀以時教養有具有司之責也侯勉乎哉明楊榮修學記宣德癸丑常熟重修廟學成吏部稽勲主事錢衡世家斯邑少常遊是學來請於子曰學在縣治東南其地隆然以高宏然而敞翺始於宋至和重修於開禧端平而再葺於元之皇慶至正其間政教興替靡常未可以概舉也洪惟國朝文教聿興洪武庚戌教諭朱昞來掌事時學之制左則殿廡戟門櫺星之赫奕右則講堂齋舍庖廩之畢具其後則有子游祠先賢堂蔚然可觀歷歲滋久上雨旁風浸以圯壞未有能振之者近西江羅教諭汝寬典教茲邑慨然欲作新之計其工費浩繁慮有弗給乃先度其力可為者為之若廡廡講堂門垣齋舍及先賢祠宇皆循次修葺惟禮殿未之能也壬子之秋縣丞李子廉主簿郭南暇日視學宮見汝寬用力之勤亦慨然曰學宮責在有司吾輩視其頽廢而不加力寧無愧焉乃各捐俸以倡訓導徐萬鑑翁玘力贊助之命耆老平孟悅等督其事衡適得請於朝歸省墓乃奉白金四百金佐其役仍率邑之好事者王惠吉陳崇道張士良錢汝周楊顏等損資以助於是聚材鳩工殿之梁棟榱桷瓦甍墻壁之毀者易之帷幙器用之弊者新之聖賢像設章服則繪飾之與汝寬先時所修葺者輪奐華彩相為炫耀焉是役也不煩於

官不擾於民而率以時就誠可謂難矣敢求一言以示不朽
 予嘉佐邑者之得人又嘉衡之能輕財而知所尊也故不辭
 其請而為之言曰學校育材之地風化之原為國家先務也
 天啟皇明大一統文明之治開萬載太平之業在內則立胃
 監在外則府州若縣莫不有學而學之規制蓋已超軼漢唐
 宋元娓娓乎唐虞三代之隆矣皇上嗣登寶位尊崇儒道凡
 一言一動莫不師法孔子以弘堯舜之治而又屢詔天下修
 理廟學然郡縣之吏能奉承者鮮而常熟邑佐李廉郭南
 知其所重一新學宮可謂能祇順德意者已夫常熟乃子游
 過化之地子游聖門高弟也則今縣之令佐與夫為師生者
 優游於茲當何如哉必景仰賢哲修舉學政且務為己之學
 盡乎孝弟忠信之道勿徒銜名譽徇利祿以負國家建學立
 師之盛意則庶乎其可也故以此復衡之請且告其邑人焉
 吳訥尊經閣記常熟縣學首創於宋之至和重建於端平初
 左廟右學大成殿後有言公祠祠右有明倫堂正統元年知
 縣上虞郭南撤堂新之越三載又撤兩齋改為重屋并市學
 東民地重建射圃以便諸生習射辛酉冬教諭浚儀趙永言
 建議郡庠舊有六經閣吳庠近建藏書樓本學曩承太祖高
 皇帝頒降大明律等書暨太宗文皇帝五經四書大全等集
 俱置廡下地土卑濕塵雨蒸沍儻得樓閣以藏庶垂永永時

掌縣事者新建陳澄也聞而善之乃撤堂後寢屋捐俸為倡
 復勸邑人伙助錢米鳩工市材建閣五間二夾室名曰尊經
 閣縣令郭南以公出歸因出俸米完其未備經始壬戌季秋
 既望落成嘉平之月哉生明之日而教諭永言請為之記因
 言讀諸碑誌心竊有疑宋寧宗慶元己未徽國朱子為知縣
 事孫應時記言公祠後二十八載理宗端平丙申魏文靖公
 了翁為邑令王煥作新建學宮記惓惓然表章朱子記文之
 說至篇終引禮書云時人以典禮質問者十有四皆以游一
 言為可否三代典章之遺賴以有存此朱子未言者若記中
 所謂南方之學得其精華及一洒媮儒無廉恥嗜飲食之譏
 此二事文靖公未嘗發明幸併開釋以告後學於戲訥蚤游
 邑庠觀明倫堂扁左刻新安朱熹書右刻稽陰王煥立稍長
 讀丹陽公祠堂記有得其一二焉按隋書儒林傳序云南北
 所為章句南人約簡得其精華故朱子記稱子游簡易疎通
 高暢宏達意必敏於聞道豈非所謂得其精華者自古而然
 耶又按荀况非十二子篇云媮媮憚事無廉恥嗜飲食是子
 游氏之儒朱子於是引而不辨夫子游聖門高弟論學知大
 學之本治武城知禮樂之道豈有如荀况所譏者乎荀去子
 游幾二百載其時弟子鄉人或狃於習俗遂乃譏及子游故
 朱子記云願諸生勉進所謂本所謂道使此邑之人百世之

下復有如公者出一酒媮懦憚事無廉恥嗜飲食之譏期望後學至深切矣洪惟聖朝太祖高皇帝即位之初詔天下立學校遴儒師訓迪子弟厥後設科取士以四書五經為主諸所註釋訂定率皆朱子之說迨太宗文皇帝命儒臣纂輯大全凡悖朱子者弗錄今作閣記舍朱子之言何以爲言哉朱子嘗言道在天下原於天命之性行於君臣父子兄弟夫婦朋友之間其文出聖人之手存於易書詩禮春秋孔孟之籍凡天地陰陽事物之理修齊治平之道禮樂選舉食貨兵刑之制靡不備著於中自昔師以是教弟以是學今學者類多記誦剽竊內以傲其父兄外以驕其閭里終身不知自勉而卒就小人之歸然豈專在學者之罪亦典教者不知所以教之道也於戲今之爲師爲弟子者其可不以朱子之言爲法爲戒以無負國家建學毓賢之意乎昔者張伯玉記吾郡六經閣曰諸子百家皆在而不書尊經也夫尊者恭敬奉持之謂豈徒尊閣奉安而已抑又惟吾邑山水明秀登閣則一覽在目竊恐輕俊少年罔思天朝祖宗頒降經書在上或張譙於閣之下或酣營之餘追逐笑嬉非惟墮乎相鼠無禮之惡抑亦墮乎嗜飲食無廉恥之賤矣凡鄉邑後進其慎之哉若夫本武城絃歌之政推廣學道愛人之心是又師帥之職也愚於此有深望云

先師廟

崇聖祠

吳公祠初在明倫堂東宋慶元三年知縣孫應時建祀吳公

言偃

舊封丹陽公

開禧三年知縣葉凱脩寶慶間移

文廟東端平元年知縣王燾移建

文廟後明成化二年知縣祝獻教諭張景元復移

文廟東

本朝康熙間知縣趙濬重修四十四年

聖祖仁皇帝南巡御書文開吳會四字頒榜祠中

宋朱子熹記平江府常熟

縣學丹陽公祠者孔門高第弟子言偃子游之祠也按太史公記孔門諸子多東州之士獨公爲吳人而此縣有巷名子

游橋名文學相傳至今圖經又言公之故宅在縣西北而舊
 井存焉則雖不可復見而公為此縣之人蓋不誣矣然自孔
 子之沒以至於今千有六百餘年郡縣之學通祀先聖公雖
 已列侍從服食而其鄉邑乃未有能表其事而出之者慶元
 三年七月知縣事通直郎會稽孫應時乃始即其學宮講堂
 之東偏作爲此堂以奉祀事是歲仲冬長至之日躬率邑人
 學士大夫及其子弟奠爵釋菜以妥其靈而以書來曰願有
 記也熹惟三代之前帝王之興率在土以故德行道藝之
 教其行於近者著而人之觀感服習以入焉者深若夫句吳
 之墟則其虞夏五服是爲要荒之外爰自泰伯采藥荆蠻始
 得其民而端委以臨之然亦僅沒其身而虞仲之後相傳累
 世乃能有以自通於上國其俗蓋亦朴鄙而不文矣公生其
 間乃能獨悅周公仲尼之道而北學於中國身通受業遂因
 文學以得聖人之一體豈不可謂豪傑之士哉今以論語考
 其語言類皆簡易疎通高暢宏達其曰本之則無者雖若見
 誦於子夏然要爲知有本也則其所爲文學固宜有以異乎
 今世之文學矣既又考其行事則武城之政不小其邑而必
 以詩書禮樂爲先務其視有勇足民之效蓋有不足爲者至
 使聖師爲之莞爾而笑則其與之之意豈淺哉及其取人則
 又以二事之細而得滅明之賢亦其意氣之感默有以相契

者以故近世論者意其爲人必當敏於聞道而不滯於形器
 豈所謂南方之學得其精華者乃自古而已然也耶矧今全
 吳通爲畿輔文物之盛絕異曩時孫君於此又能舉千載之
 闕遺稽古崇德以勵學者則武城弦歌之意於是乎在故熹
 喜聞其事而樂爲之書至於孔門設科之法與公之言所謂
 本所謂道及其所以取人者願諸生相與勉焉以進其實使
 此邑之人百世之下復有如公者出而又有以一洒夫媮懦
 憚事無廉恥而嗜飲食之譏焉是則孫君之志而亦熹之願
 也公之追爵自唐開元始封至淳熙間所頒位次又改稱吳公
 公而紹興御贊猶有唐封至淳熙間所頒位次又改稱吳公
 云明楊一清記成化乙巳冬監察御史鉛山胡君漢按節三
 吳過常熟祇謁先聖退謁先賢吳公子游祠祠偏禮殿隘
 弗展君顧瞻畫咨乃進蘇州府同知華容毛君瑄曰吳公大
 賢常熟鉅邑維祠堂僻弗稱殆非所以崇道德勵風教也盍
 相與撤其舊而新是圖毛君曰諾爰率諸博士弟子度地於
 學之東偏遂承檄任其事然本以義舉不欲勞民力時教諭
 天台張景元捐俸首事邑之士民尙未丕應無何蘭江祝君
 獻起進士爲邑令用君意勸誘屬人聞者風動共欣助之乃
 卜吉命義官董其役隆棟厚礎旣轟且安堂室中嚴門廡森
 列經始於丙午春三月至次年秋九月訖工議者猶病祠地

前迫義官趙璧市民居以廣之由是宕然開朗視舊觀不啻
 數倍耕農販夫但見新祠之煥儼而不見庸調之及己也毛
 君寓書鎮江屬予記嗚呼時至春秋王者不作詩書禮樂之
 化或幾乎熄矣吾夫子出始立教以振之時則有吳公邁迹
 句吳北學於中國開東南文獻之源其有功於鄉邑甚大先
 民有言盛德宜百世祀故鄉先生沒則祭諸其社尸而祝之
 公道德之在天下者朝廷通祀萬世無議其在鄉邑則澤潤
 後人不但所謂鄉先生而已為之特祠以奉祀仰止景行之
 意於是乎存夫祠不祠不足為先賢重輕獨以義而風化其
 下者有司事也胡君方稽覈戎籍顧能於風教究心君子於
 是當有以窺其趨操之正矣若夫為政為學公所受於聖人
 之家法具在凡吏於此而不能以詩書禮樂化訓其民士於
 茲而不能志公之志學公之學皆棄
 於公者也因以麗牲之石併著之

名宦祠祀劉宋縣令何子平唐縣尉張旭宋知縣孫應時王
 燾元知州孔文貞盧克治明知縣李彰柳敬中王綸楊子器
 秦禮王鈇黃嘉賓楊漣教諭劉文詔訓導于之鏞

本朝知縣于宗堯林象祖總督于成龍傅臘塔總漕郎廷極巡
 撫宋犖布政使劉鼎驛鹽道蔡琦提學邵嗣堯許汝霖張泰
 交張榕端張元臣余正健糧守道史起賢遲日震知府陳鵬
 年同知高鈇

鄉賢祠祀商巫咸巫賢宋周容陸綰翟汝文錢觀復錢俟錢
 佃冷世光崔敦詩周虎王萬邱岳陳元大王堅王安節元褚
 伴哥明黃鉞張洪衛浩吳訥魚侃程式鄧彥章張懋章格程
 宗楊集桑瑾陳易李傑徐恪沈海瞿俊陳喆周木王宗錫時
 中盧翊陳播王槐蔣欽唐天恩丁仁陳察張文麟鄒武丁奉
 陳寰鄧韞王舜漁陳迓張文鳳錢泮嚴訥瞿景淳邵圭潔陸

一鳳查光述陳瓚嚴激瞿汝稷王嘉言蔣以忠趙用賢陳國華王之麟陳禹謨翁憲祥陸重科徐待聘宋懋中顧大章龔立本魏浣初許士柔王夢鼎王夢鼐楊彝孫永祚趙士春蔣棻歸起先錢永達項志寧

本朝錢朝鼎王曰俞王澧李臨蔣伊周慶曾翁叔元汪惟時汪錫爵席啟寓程化蛟

按舊有六先生祠在

文廟東北宋端平元年知縣王爚建祀周子敦頤程子顥程子頤張子載朱子熹張栻先賢祠在吳公祠左明洪武八年建祀宋范仲淹胡瑗王爚永樂間移建學門西今並廢

忠義孝悌祠在縣治北

本朝雍正元年

詔建祀漢黃香晉許儒唐龔景才宋宗澤李綱王堅王萬王安節明鄧彥章景清言信黃鉞繆樸陸子高程式任環蔣欽王鈇錢泮張承慶王奕昌顧大章查光述徐簪唐天恩陳焯卿瞿式耜趙士端王魯李維麟馬廷試顧坤瞿興嗣譚曉譚照本朝席永昇王松齡蘇宗芭王弘紱沈萬育呂樾王子齡殷鉉程永祖陳模錢邦憲王樹聲孫穀潘潔湯之仁

按祠制宜在學中以縣學地
隘別卜慧日寺西仍隸縣學

教諭宅在明倫堂後

師生員額

宋制詳見吳縣學元升州制詳見崑山縣學明制詳見吳縣學

本朝教諭訓導各一員雍正三年析置昭文縣以訓導司昭文縣學初廩膳生員二十名增廣生員二十名附學生員不限額文生遇歲科兩試各取二十名雍正三年

詔增五名武生歲科併試取十五名析縣後廩膳生員十名增廣生員十名文生遇歲科兩試各取十三名武生歲科併試取八名

學田

元至順初邑人曹善誠助置田若干畝山若干畝

黃潛記常熟故吳地

州之西子游宅在焉當孔子時吳通上國已久北學宜非一人獨子游以身通受業列於七十有二人之間而其言行見於紀錄為甚其迨今千有七百餘年生其地而好學能文名者猶彬彬焉風氣之厚俗習之盛誠非旁州比縣之所及然自其縣時已有學而所占田多薄瘠以歲之不易也諸生往往無所仰食學校之養顧出他州縣下絃誦之聲希澗寂寥前後為是州若職教事者思有以裕之而未知所以為計學之賓老以為州之有力而名好事莫如曹君乃相率造君以為言君欣然為輟田之可畊者若干畝山之可樵者若干畝以佐之羣居聚食始無所乏絕莫不德君之為而願得子文以記之子聞古昔授田建學悉有成法民之為士固不必廩於學官而大家巨室亦不得有羨田以資施與也自先王之法壞而不可復見說者蓋以為三千之徒聚而食於孔子或又以飲食之人為子游氏之儒何言之無稽耶今之去孔子日益以遠有能聞布衣養徒之事而興起焉可謂難也已若夫為弟子員而藏脩息游於斯者皆生於子游之鄉而得其風氣習俗之美者也苟無辜乎居之安食之飽而必有事將見其處也必無愧乎子游之文學其出也必無忘乎子游之

學道而愛人一簞一瓢不足為其儉萬鍾之祿不足為其泰孰得以區區飲食之細厚誣君子也哉是用弗讓而為之記以告來者云爾

按宋時學田無可考黃記謂所占多薄瘠則舊固有之矣明代撥助次第不得其詳僅以前志所載萬歷二十七年教諭李維柱清釐頃畝列於左

撫按學田二頃六十三畝六分四釐一毫

關部學田一頃二畝九分八釐四毫

儒學田四頃四十四畝七分四毫

社學田四頃五十七畝七分八毫

蘇濤學田一頃五十畝一分五釐九毫

祭器田八十二畝七分三釐

以上田租歲久亦多蕪廢

本朝康熙五十九年布政使楊朝麟核實在田一十二頃九分

屬教諭訓導司出納雍正三年析存田四頃一十八畝六

分二毫

文學書院初在縣治東北元至順二年邑人曹善誠建祀吳公

言偃闢講堂列齋舍有司上其事設山長主之宣慰使王都中題額楊剛

中黃潛記至正末燬明宣德九年知縣郭南即學西公館增飾堂

廡為書院巡撫侍郎周忱更其額為學道即都憲行臺詳見官署嘉靖


十一年知縣徐滢改為學中射圃四十三年知縣王叔杲得

廢圃於縣治西北去吳公墓二百步闢書院仍名學道萬歷

十年廢後知縣耿橋倡率重建更名虞山書院構弦歌樓樓
前發墨井築方塘堂中鐫先聖像兩廡鐫賢哲像申時行王錫爵記
天啟六年逆璫矯詔拆毀崇禎六年言氏後裔復其地知縣
楊鼎熙重建有本學道二堂

本朝康熙四十六年參政馬逸姿修歲久圯元黃潛文學書院記昔州縣未有學
先儒或擇勝地建精舍以講授為政者輒就而褒表之號曰
書院宋初天下書院惟白鹿睢陽之有田僅見於傳記皆上
命州縣咸立學而學校之官徧天下書院之創置日亦增多
我朝尊右儒術以風厲海內聞者莫不知勸有力而好事之
家往往構廣廈以崇禮祠輟良田以豐廩食其為書院者遂
與州縣學參列布滿於四方既奉濂洛乾淳二三大儒以為
先賢而於前代名臣山林高蹈之士有所弗遺凡尸而祀之
者非仕其國則其鄉邑孔氏之門從遊三千速肖七十獨子
游為吳人今常熟州實其所居里南州之先賢孰有加於子

游者乎故為縣時餘姚孫侯應時知縣事嘗為位於學宮祀
之後百五十年為今至順二年州人曹善誠始買地作祠宇
而闢講堂於其後列齋廬於其旁有司因為請於中書設師
弟子員而揭以新額曰文學書院曹君瞻以田一千六百有
奇恐旱乾水溢之不虞將割田以繼者疑為苟避征徭未敢
自言大名王侯侃來守是州力勸相之於是曹君益之畀以
田二千六百畝有奇事聞於郡未報而王侯以秩滿去曹君
亦入掾太師府今守張侯衍閱故牘而得其始末亟命佐吏
賈天瑞詣郡關白自是其田有苗稅而無力役春秋之事得
不匱乏為士者亦有所蒙賴而優游於誦弦俎豆間鄉貢進
士達里新署其山長而未上攝書院事者儒學教授徐夢吉
以為曹君有功於名教與兩侯之成始終皆不可以無述爰
狀其實屬潛記之潛竊觀孫侯舉曠古之闕典意甚美而為
事殊簡畧特以先師朱子之記傳之至今曹君乃能不愛其
所有而致力於孫侯之所不及固已不易以一鄉之善士而
專任樂育人才之責亦古所無有也明瞿景淳重建文學書
院記永嘉王公治常熟之二年乙丑政修民和百廢具興學
宮之左有吳公祠公既展謁因嘆曰嗟乎茲固先賢吳公之
鄉也國家方以文學造士今僅有祠而書院不立造士之制
無乃缺諸且嵩陽嶽麓類有書院矧茲為吳公之鄉而獨缺



焉固有司事也乃相地於邑治之西得廢圃一區介兩憲院
 間西枕山麓顧瞻則吳公之墓在焉公曰可矣乃白之按院
 溫公溫公亟是之首發贖金若干助其役公乃度基址計丈
 尺具材用卜日興工其地南阻民居乃東闢為書院門門內
 稍虛其南為坦途北折為表曰南方精華言吳公之道本洙
 公也門內為池樹以綽楔表曰洙泗淵源言吳公之道本洙
 泗也又進為學道堂揭示遺訓俾士民知所興也堂北為祠
 門中建祠宇旁翼以亭自非瞻禮門不輕啟明有敬也堂之
 左右稍北則對立書樓稍南則對立號舍各蔽以牆出入有
 門升降有階士之肄業其中而升堂問難者咸得霑時雨之
 教也吳公故有專祠然僅容俎豆而不足以聚生徒則崇教
 之道未備今書院之立奉祀有祠講道有堂藏書有樓肄業
 有舍規制宏敞真足以報吳公之德而慰吾人景行之思矣
 余獨念今之以文學名者或有異於吳公也吳公之文學蓋
 篤其實非徒飾空言者若今之文學徒飾空言為干祿之資
 爾無乃有異於吳公乎世有豪傑之士必有不安於科舉之
 習而以操履為重者矧至吳公之鄉而依其門牆可徒浮華
 是競以忝吳公乎是可以省矣不然邑故有學校豈不足以
 造士而司教化者必
 勤勤於書院之立哉

虞山書院在虞山南麓梁昭明太子讀書臺右

本朝康熙中督糧叅議劉殿邦因臺構堂以為游憩之所雍正

三年副使楊本植改建書院乾隆二年副使姚孔鈞延師課

士其中八年知府覺羅雅爾哈善重修十一年重修叅議程

光鉅闢圃於後作亭曰卓爾距亭西數武石壁間有泉湧出

甘冽不涸

程光鉅書院後圃泉銘涓涓巖泉清淑凝聚氣至
 機流沛然莫禦匪靜曷恒匪動曷著雲竇有源試

為尋溯
 籥際我

伊昔未達湛然中藏歷千萬禩韜厥聲光孰啟其

聖皇山川應運靈液流滂

鬱鬱虞山先賢是宅帝子遺臺流
 風足式天牖斯文泉飛講席一瓢洗心勗爾朝夕 蒙以養

正聖功是基有冽者泉若示其微體茲
 不息日進庶幾勿謂可待逝者如斯

虞溪書院在阜成門外明參政周本建祀虞仲其中弘治間知

縣計宗道顏其堂曰讓德

養賢書院在明倫堂之西

本朝康熙四年復學宮旁址之侵於民者海防同知魯超建

社學舊在縣治西明成化間知縣甘澤建弘治八年知縣王綸

重建於慧日寺西十年知縣楊子器復拓之萬歷中知縣張

集義構門廡復舊制知縣楊漣延塾師以教貧民子弟今廢

義學在三十七都沙頭之南元泰定二年楊伯麟築室為學舍

置田供租

元閻復記畧吳郡義田自范文正公始常熟縣楊侯實踵行之侯家居琴川百有餘年宗派既蕃思以義庇其族於沙頭里墾田若干築舍二十楹延耆儒以主師席凡族中之貧者有養老者有奉少者得致力於學予嘗為部使者知侯尚義之志老而彌篤不可不為表見於世

昭文縣學附常熟縣學

訓導宅在明倫堂西

師生員額

雍正三年以常熟縣學訓導為昭文縣學訓導廩膳生員十

名增廣生員十名附學生員不限額文生遇歲科兩試各取

十二名武生歲科併試取七名

學田

雍正三年析常熟縣學田七頃八十二畝二分九釐八毫屬

訓導司出納

義學在方塔寺右

本朝乾隆八年建

吳江縣學在東門外長橋河北初有

文宣王廟在縣治西宋大中祥符五年詔郡邑修廟縣令李恭

尉聶復作新之慶歷七年縣令李問尉王庭堅議改廟建學

會詔止其役元祐中知縣程端始立學自為記建炎兵燬紹興

中知縣石公轍以東開江營舊基及邑人王份獻地改建卽

今址也乾道初知縣趙公廣拓其規制凡三十餘楹講堂曰

明倫四齋曰興賢進德日新時敏淳熙五年知縣陳翥修嘉

定八年知縣孫仁榮重建大成殿十年知縣呂祖憲修盛章記

淳祐初學長王南建登龍橋於學之左因形家言翔之南占後科鼎魁陳炎發相

繼登

宋季悉燬於兵元至元十三年都元帥竄玉駐兵鎮吳

江重建殿宇塑繪聖賢像三十一年縣尹王柔建講堂齋舍

元貞二年陞州學立四齋大德二年教授謝起東建兩廡繪

從祀諸賢像四年知州李玘建櫺星門延祐四年知州高仁

葺殿堂齋舍建儀門屏牆顧儒寶記至治三年教授孔文榘榘一作相

卽儀門增戟二十有四至正十一年知州邵萬重修陸居仁記十

三年達魯花赤札牙進建戟門置大成樂許從宣記明洪武二年

復爲縣學定東西二齋曰日新時敏立射圃於學西南八年

置觀德亭三十年教諭汪茂實修正統十三年巡撫侍郎周

忱知府朱勝拓左右民居以展宮墻重建廟殿景泰六年巡

按御史趙縉建後堂及學舍共三十六楹知縣賈亮重修廟
 殿明倫堂成化八年知縣王迪又徙民居以拓廟庭弘治十
 年知縣郭郭修正德十年巡按御史唐鳳儀改建明倫堂嘉
 靖二年知縣王紀修周用記十六年知縣林應麒建泮宮坊於
 學宮前三十二年知縣楊芷建時化射圃二亭周大章記萬歷九
 年知縣徐元修廟十八年知縣趙夢麟修兩廡及明倫堂顧大
典記二十七年知縣孫大壯修五門沈季文記三十九年知縣馮任
 重修廟學并建泮宮門樓周道登記四十二年知縣魏士前重修
 啟聖祠櫺星門敬一時化射圃三亭吳默記四十八年署縣事
 同知康元和卽時化亭改建尊經閣崇禎二年知縣熊開元

移啟聖祠於廟後

祠初建於儀門外西南

改建明倫堂及東西兩廡又

修龍門十四年知縣葉翼雲建觀德堂於射圃亭址

本朝順治九年知縣唐增教諭陳繩舜十一年知縣吳就恒教
 諭洪天開十三年知縣雷珽相繼修整康熙三年同知魯超
 推官龔在升倡修明倫堂儀門二十三年知縣郭琇訓導秦
 去非重修廟學四十三年知縣張元振重建尊經閣五十六
 年知縣石拱極修廟五十七年知縣葉前繼成之雍正三年
 析置震澤縣遂爲吳江震澤二縣學乾隆三年知縣趙軒臨
 教諭廖維新修崇聖祠明倫堂尊經閣九年知縣丁元正震
 澤知縣陳和志重修大成殿宋陳堯佐新廟記道濟萬物而萬物不知所以然故聖人條其

教而教之教之弗率而又以其刑而刑之由是君於上臣於中民於下尊卑貴賤儼如也故禮樂征伐自天子出後之學者或曰吾師佛也吾師老子也復又有百家之說穿鑿戶牖於是教分爲三流析爲九鳴呼教果三乎流果九乎且未喻佛何爲也老子何爲也言之彬彬書之云云是欲化人爲善乎爲不善乎果欲善也則孔子之教不爲不善矣水濟水也安得而異曰江曰河曰渠曰溝各斯別矣體復二乎且夫生而免乳必諷其言死而就木必由其理起居飲食一以資之此乃孔子之教不可須臾而去也雖欲去之有能去之者乎或者北其轅而騁越西其流而走海蓋有之矣未見其至也復之上六迷復凶謂迷復之凶又誰咎也國家紹千載之統炳二聖之業東封泰山蒼天之休也西祀汾壤復地之利也而且謁見靈闕飲解宗廟噫爲禮之盛有過於此者乎爲教之大有過於此者乎多士討論之聖君則成之明白光大垂耀永世夫如是則孔子之爲道也不爲不尊矣孔子之爲書也不爲不信矣王者尊之率士奉之適其宜矣又安從而他師焉姑蘇南門邑曰吳江乃錢氏武肅王之所建置疆畫長洲之苑門涵震澤之源魚鹽蜃蛤既邀逐末之利詩書禮樂遂昧好學之訓會詔下郡邑悉煥儒廟縣令李恭尉聶復等喜而言曰由己而爲專也專則有悔自命而作順也順則無

咎既而營材具工補壞繕廢棟宇之制遙資乎闕里俎豆之設仰法乎太學門人先侑室書鱗鱗泯然之毗於斯改觀卓爾之士可以弗畔又若罇篚之器縣官具之奠獻之數朝廷著之雖顯蒙者視之瞭焉茲又上之化下以道下之奉上以禮可以亘萬古流頌聲於無窮也余竊大君之祿外計之寄錢刀之司實曰己任俎豆之化又匪他務會按歷所部展至新宇惟令及尉趨而言曰天子有命執事不接廟成弗識歲遠何覩願得正人之論以刻泰山之石余聞其言則思當請而諾蓋喜乎播吾后錫羨垂鴻之慶亦樂乎揚孔子垂教化民之旨黔淺之說孤陋是思或曰三教九流果何如也曰三教不二九流歸一吾子思之知其異不異也陳從古修學記學校者政本之所自出講禮閱樂習射考藝養老齒胄獻囚告讖無不寓焉詎可一日廢也世之俗吏倒本趨末德惇然以簿書獄訟爲急視學校爲虛器無惑乎風化之行政本之不立也三代之時家有塾黨有庠術有序國有學人以安於禮義廉恥之域而無暴慢鄙倍之心故孟子謂學則三代共之皆所以明人倫也人倫明於上小民親於下可謂知本矣自子衿之詩作士子競爲城闕遊溟然無所歸宋興尊儒隆道州邑率詔置學自漢及唐未有如祖宗之盛也中更金虜之變一時學舍莽爲盜區浙右尤甚吳江界往來之衝六

龍南渡駐蹕臨安實為畿邑士大夫行李取道半天下使客
 旁午曾不得一夕寧為邑者平日視事操牒摠案獨臺符府
 檄金穀趣辦之興是憂至學官廢弛漫不經意故民不知教
 簪筆健訟視他邑最乾道之初乏宰再歲郡擇士者攝之席
 未暖即去知縣趙公領事之始慨然歎曰吾為風化之首今
 學校鞠為園蔬邑之父兄鮮以夫子之道詔其子弟甚者先
 聖殿上兩旁風春秋奠菜無所存庇此今所當憂也前政石
 公鞅嘗創之矣未幾中輟吾詎忍不終其事乎卜日鳩徒撤
 舊更新夷荒剔蝨周以重階墜以兩廡中奠廟室環列繪像
 生師有舍禮器有所賓客之廬庖廩之次無一不具公曰學
 具矣無貲財以養士徒學為於是將舊籍漁兒月計錢二十
 萬永為廩餼之費凡片瓦尺椽市於旁邑民不告勞丞俞希
 尹實贊其事經始於乙未之秋落成於是歲之冬邑之羣士
 鼓篋歡趨以後為恥絃歌之聲夜以繼日公又嚴規程以防
 其怠者則公之慮遠不為朝夕計益可嘉也吁學校之設不
 徒設也世知甲兵可以威天下不知學校亦足以威天下蓋
 甲兵威之而不足學校威之而有餘昔朱泚之亂士風皆靡
 何蕃以布衣之微一叱而回六館之士孰謂學校無益於人
 之國哉今諸生宜以古學為心不徒為章句誦說之習異時
 孝於家忠於國無負聖天子教育之意則所以報公者亦無

愧矣余吳人也往來彼數矣見其水波溟渤羣山映帶遠混
 天碧長橋卧波橫截其中因艤棹岸巾尚羊四顧曰脫屣天
 刑扁舟五湖豈非鴟夷子皮之遠遊者乎秋風颯然蓴鱸芳
 鮮豈非張季鷹之思歸者乎行歌長吟興渺雲水豈非陸魯
 望之嘉遜者乎大抵山澤英靈之所萃其寓於物也必有瓌
 奇雄傑之觀其毓於人也必有高明俊秀之才為時而生者
 今有待於學校以作興也趙公既建國矣則才之所以成就
 者吾知必有人焉公名公廣字德儉屬籍之賢有文者其為
 政知本末又能推餘力以及郵亭使館橋梁祠宇一新之部
 使者以能聲交薦於朝今為南徐別駕公雖去邑之士不忘
 公賜相與請記於余欲刻之石以告後人余嘉公之政如此
 不敢以固陋辭時淳熙五年五月黃由修大成殿記祥符五
 年二月吳江縣始建學丞相文惠陳公堯佐為兩浙轉運使
 實記其成當是時宋興六七十載海內無事文始大興詔郡
 縣悉置學守若令得祀夫子令李度築縣偏以奉詔書規創
 軒偉廟貌適嚴俊語明章相為發揮學校之盛稱於二浙既
 厄於兵令石公鞅乃改而南大成殿之建距今又七十載棟
 橈榱腐聖繪漫漶春秋釋菜觀者太息令劉伯麟輦錢五十
 萬議葺治不果今令孫君仁榮初拜學宮有慨於心義劉之
 為願竟其役於是捐金糜穀至割圭租躬執朴畧無留難明

年夏六月已成簷楹飛敞像設一新承平氣象宛然如在由
 有園百畝撫上所賜詔墨是名盤野幸與學隣扁舟遇之輪
 奐奪目乃載酒為諸友賀席間人人言令君之賢豈弟不擾
 百廢具興未幾皆及吾門且述所以嘉惠鄉校者謁由書之
 由再三辭不獲則進諸君而告之曰學之興廢時也道之窮
 通命也惟不以窮通累其心而一以救時行道為事此吾夫
 子所以異諸子也至於今名教被於四海祀典垂於百王其
 於啟人心惠斯世者蓋與天地相為無窮豈直籩豆斯存歲
 時謁奠而已吳江壯哉縣水天寥濶清淑扶輿數千百年間
 豈無長才秀民行夫子之道於世顧使高人隱士脫身世鞅
 者多擅茲邑是豈夫子詔吾黨之意哉夫沮溺耦耕晨門荷
 蕢謂非知幾有道之士則不可夫子奚不深取以為世道計
 也噫出處何常惟義之歸屑意軒冕顛冥利害之途而不知
 返固非也忘斯世獨善其身將孰與任天下之事轍環諸國
 削跡伐木夫子有不得已於此者矣諸君勉之入宮墻拜冠
 履而念及此則通經學古期於有用得時行道思濟斯民皆
 聖門事業毋徒曰吾自有東家某此則由之志也亦令君所
 以尊嚴先聖淑艾吾黨之意也語曰十室之邑必有忠信不
 如某之好學也諸君勉之元朱子昌修學記吳江平江之屬
 邑有秦伯延陵之遺教故其俗淳以厚有鳴夷子皮季鷹魯

望之高風故其士清以逸有三江五湖之形勝故其地為古
 今之雄盛余曩奉三高祠徘徊學宮摩挲石刻觀陳文惠公
 所記則知此邑學校蓋甲於吳之諸邑自大中祥符已然紹
 興改創規模宏大風驚雨過蕩不復完所僅存者大成殿講
 堂而已鎮國上將軍都元帥審侯玉葺而新之自至元癸巳
 八月鳩工正殿始復相是役者敦武校尉杜福然講堂齋舍
 未及也是邑王令君柔勇於為義以明年八月與邑之長貳
 復倡士民舍其舊而新是圖講堂廊廡齋舍下逮倉庾庖湍
 之室具備前學錄俞處仁儒林偉士也捐金繼粟賴其力為
 多落成後教諭王沂李文箴合詞請紀成績予謂承流宣化
 吏之職也政教異焉漢言循吏以西都為稱首龔遂渤海黃
 霸潁川不以柔服強暴為能則以發摘奸伏為事文翁治蜀
 其治辦之迹一無可言不過興學校教生徒而已班孟堅傳
 循吏顧乃列於龔黃諸人之先豈非詩書禮義之澤入人也
 深教為政之本固有在此而不在彼歟是邑當驛道憧憧往
 來仕於此者於將迎中不至廢事斯亦可矣何暇他及有能
 以興學校崇教化為先務者亦可向已士之肄於斯者其可
 負所學歟泮水為頌僖公而作修泮宮一事不書於春秋而
 見於魯頌蓋泮宮乃因魯舊有而能修故春秋不書然魯人
 頌美之辭在聖人所不廢也予職儒司因士心從輿論不容

以蕪陋辭時元貞元年九月明趙寬修學記國朝之制縣必有學學必有廟天下皆然然有修飾者有荒陋者各視其地之文獻及作興之人何如耳所以明人倫育英才欲其寬閑靜深以為士君子進德修業存心養性之地廟所以尊事聖賢報本追遠欲其高明嚴肅然後人望而敬有以興起夫景仰企慕之心吳江廟學自宋元有之正統中巡撫少司空吉水周文襄公始拓其基宇而改剏之規模宏敞他邑莫及也歷歲既久日以頽廢弘治戊午春寬以刑部郎中奉使河南便道鄉間祇謁先聖廟庭顧瞻宮墻周覽區宇輪焉奐焉鳥翼翬飛丹雘焜煌照映雲日殿曰大成門曰列戟曰櫺星祠曰鄉賢曰去思堂曰明倫齋曰日新曰時習以及神廚神庫膳堂射圃學官之居諸生肄業之舍倉庾庖湏之屬昔之卑庠者今則增以崇昔之毀敗者今則完而新昔之巧墁者今則潔而明矜佩之士弦於斯誦於斯藏修息游於斯皆得以安其居靜其慮大肆其力於詩書禮樂之場而無喧囂之雜湫隘塾濕之憂予喜而問曰孰為之哉何若斯之盛也眾咸曰此吾邑侯之嘉惠也吾侯下車首務斯文近日司宰牧者所未見也予因問繕工之始末曰侯以丙辰之冬來至任經始於明年暮春之初訖工於孟夏之終問經費之所出曰取材於官而役力於民民欣然趨之命陰陽訓術吳蓋敦匠事

蓋公勤有幹畧長於料理學諭高君督視之尤加意焉故其成速而精予聞而嘉之侯之政豈不異哉侯以進士釋褐來宰邑視事之初錢穀獄訟案牘山積宜若不遑他務者乃能從容有餘以從事於教化之地其才力優於人遠矣世之好興事者厲民惡勞民者廢事今也有子來之樂而無疾首蹙額之怨此何以致之哉秉彝好德人之同心矧吾邑固文獻之區哉侯因民所欲而使之宜奔命之易也教化行而風俗美思樂之風作而棫樸之士興焉必自今日始矣高君與司訓林君陳君聞予言請書之將刻貞石詔來者予辭不獲遂書以歸之侯姓郭氏名郭字于蕃廣平肥鄉世家也廉明嚴肅達於政體治邑一年而良法善事具可稱述不獨興學之美云

先師廟

崇聖祠

名宦祠在櫺星門外東祀唐刺史王仲舒宋知縣李問向子韶石公轍元都元帥寧玉州判張顯祖明侍郎夏元吉巡撫

侍郎周忱知府况鍾朱勝提學御史孫鼎陳選知縣李遷梧
劉時俊教諭蔣弘憲

本朝知縣劉定國郭琇總督于成龍傅臘塔總漕郎廷極提學
邵嗣堯張泰交余正健

鄉賢祠在樞星門外西祀宋魏憲王蘋陳長方楊邦弼王份
沈義甫元王原杰明馬達徐琛吳璋莫旦趙寬王哲沈啓張
源張基徐師曾龐遠吳邦楨顧曾唯杜偉周大章沈位孫從
龍李周策葉重第吳士龍葉重科毛壽南沈瓚袁黃吳默沈
琬趙士諤周宗建朱陞宣袁儼龐秉道汝可起

本朝周爰訪

按舊有祠祀宋知縣王益祥今廢

忠義孝悌祠在儀門外西南雍正元年

詔建祀宋魏憲王份陸十七曹社元陳瑞明盛逮莫轅吳璋丁
綿盛景吳埕葉紳顧寬盛應期沈奎吳山沈漢張基李濟周
大章周宗建朱陞宣趙蔭周延祚

本朝沈自顯曹天祿徐杲張維馨嚴代言皇甫沆
教諭宅在尊經閣後

師生員額

宋制詳見吳縣學元升州制詳見崑山縣學明復為縣制詳
見吳縣學

本朝教諭訓導各一員雍正三年析置震澤縣以訓導司震澤縣學初廩膳生員二十名增廣生員二十名附學生員不限額文生遇歲科兩試各取二十名雍正三年

詔增五名武生歲科併試取十五名析縣後廩膳生員十名增廣生員十名文生遇歲科兩試各取十二名武生歲科併試取七名

學田

明嘉靖二十四年知縣朱舜民置田三頃二十九年巡按御史鄧巍置田八畝九分萬歷三十六年知縣馮任撥沒官田一頃八十四畝四分七

釐教諭蔣弘憲助置田十五畝供諸生月課費

四十年巡按御史徐民式撥置田五十六畝

四十二年知縣魏士前助置田一頃八畝七分二釐二毫蕩八分八釐七毫

四十五年鈔關主事張大猷助置田三十九畝六分五釐五毫

以上田租

本朝康熙五年知縣劉定國核實在田六頃九十三畝九分五釐八毫蕩四畝八分八釐七毫除蔣弘憲助置田五十九年布政使楊朝麟復核實在田六頃八十九畝九分二釐五毫屬

教諭訓導司出納雍正三年析存田三頃五十畝三釐九毫

義學六所一在盛澤鎮西一在同里鎮俱雍正十三年邑人倪兆鵬建置田一頃四十六畝邑人王蔭槐置田十一畝九分六釐九毫一在學宮後松陵書塾一在盛澤鎮充字圩一在黎里鎮染字圩一在黎里鎮作字圩俱乾隆八年知府覺羅雅爾哈善建

社學

州社學在縣治東北元至正十九年知州趙仁建置齋二曰日新曰時敏蘇大年記明成化五年提學御史陳選卽其址

重建吳驥記今廢

古塘義塾在一都蒲圩村明成化十八年邑人姚芳建置田

八十畝莫震記今廢

同里社學在同里鎮明弘治五年知縣金洪奏革稅課局改

建史鑑記今廢

松陵書塾在學宮後

本朝乾隆四年邑人汪涵光建教諭廖維新記

震澤縣學附吳江縣學

訓導宅在忠義孝悌祠後

師生員額

雍正三年以吳江縣學訓導為震澤縣學訓導廩膳生員十名增廣生員十名附學生員不限額文生遇歲科兩試各取十三名武生歲科併試取八名

學田

雍正三年析吳江縣田三頃三十九畝八分八釐六毫屬訓導司出納

震澤鎮學在本鎮宋寶祐元年邑人沈義甫以著作王蘋教授陳長方中書舍人楊邦弼居游之地建祠立學元設教諭

主學事明初廢

明張明道重建三賢祠記仲尼肇堯濟之間於堯舜禹湯文武周公之道祖述憲章淑諸人以推於天下後世當時景從者鄒魯陳衛達於鄭宋曹許而下彬彬相望以振於中原吳在南服惟子游崛起而北學

中國考之答述問難自所立言者精約簡當稱之者謂所詣次於曾參句吳一人而已予嘗試一游上國孔門弟子祠廟所禮祀邾滕薛之小而大及於齊晉登豆行犇即地而分崇之皆冉閔之流也句吳南服巨區子游之外無聞焉程氏兄弟得千載不傳之緒能排眾議潛心伊洛以妙洙泗淵源之精延平上蔡之區朱謝楊游諸公皆殊望於中原也於吳至北宋猶未有得所學於上國獨王氏信伯系本劍南福清而先甫仲舉來居震澤句吳人也以先世近羅浮於中立仲素得其緒餘而有所決擇歆慕為伊洛高弟於春秋之學能精研其微辭奧義及晚年作論語集解古今語說亦宋之子游也寶祐間南康山長沈義甫建明教堂祠之配陳公長方楊公邦弼至元世立教諭一員主祠事後燬於紅巾里人沈善長復遷其祠於思范橋左淪湮迄今而宗系散處予同年文選郎王祿之名穀祥其的裔也學承私淑而祠貌於家松陵沈給諫之家嗣嘉猷惟良學有所見以朱程為正悵古今得所學之正者吳之兩世子游信伯而已復振前緒去浮屠遺址建三賢祠宇主信伯而以陳楊二先生侑奠外捐腴田三十畝充春秋黍餼牲豆之資求記於予予嘗遠謫南荒轉秩松陵而吳俗之嚮往亦庶乎有所聞也吳之科第振天下未必皆知朱程之學為正財賦甲於上國規規畦角町粒之間

未必皆脫然而無所吝也惟良傑然於學無所惑而崇德莫
 侑無所因而能捐其所有亦可謂拔於流俗而漸及於眾且
 遠也或者疑程朱所得與著述表章在海宇信伯登崇在鄉
 賢今不亦贅乎噫吹佛氏之燼而起象山之高恣者盈天下
 坐伊洛為支離壞世教不淺矣能於信伯所得於伊洛者肇
 端於一方使家塾黨庠沃耳饜心微顯風自豈無神交而孚
 應者乎亦斯人之徒也記之文徵明震澤三賢祠記跋震澤
 書院建自宋之寶祐歷元抵今垂三百年再植而卒淪於毀
 者歲遠名湮而扶義好德之人歎也世事變遷所在遺基名
 蹟鞠為茂草莫有過而問者其不奪於勢家規為第宅苑囿
 則既幸矣矧能起廢於荒煙瓦礫之餘哉此沈君惟良之義
 有足多者前後邑宰所為稱述讚咏而不能已也王公程門
 高弟學術端良習於從政思陵稱為通儒故其家有通儒堂
 胡文定亦謂其學有師承識通時務朱子編為伊洛淵源錄
 實惟吾吳洛學之祖蓋出魏文靖公之前今文靖郡有專祠
 載在祀典而王公不聞有舉之者書院之復豈其權輿耶若
 建置本末與王公出處事行具張喻
 二宰及憲副陸君金之文余不復列

義學三所一在平望鎮殊勝寺一在震澤鎮倪氏家祠旁俱

雍正十三年邑人倪兆鵬建置田九十九畝一分二毫一在

西門外文昌道院乾隆八年知府覺羅雅爾哈善建

蘇州府志卷十七終

蘇州府志卷第十八

軍制

吳地襟江帶海而濱太湖為東南之要區江浙之門戶宋元明以來守禦之制代有不同

本朝巡撫軍門鎮乎內提標營汛控乎外星羅棊布在在聯絡頃以承平日久

特命重臣巡視要害簡閱軍伍所以為防維計者周矣今倣姑蘇志例先列當今兵制於前而前代舊蹟仍存其大畧云

巡撫江蘇等處地方軍門

駐劄府城順治四年設中軍左右營遊守各一員五年裁左營歸併

中軍康熙元年停理軍務改中軍遊擊為蘇州城守營隸提標巡撫護衛止有披甲壯丁五十名十三年復設本標

左右二營兼轄蘇州城守平望二營

左營 順治四年設五年裁併中軍康熙十三年復設原額

遊擊一員守備一員千總二員把總四員馬戰兵一百五十名步戰兵二百二十五名守兵三百七十五名

巡船十八隻十四年裁馬戰兵一百名步戰兵二十五名守兵一百二十五名撥巡船八隻入蘇州營二十五名

改步戰兵一百名為守兵又裁馬戰兵一名步戰兵四名守兵十二名三十五年裁步戰兵八十三名三十八年調守兵一百名赴河標雍正二年撥步戰兵一名

守兵六名入太湖營五年撥守兵三名入蘇州營七年添設外委千總一員把總二員仍食馬戰兵糧八年撥

守兵二名入泰州營十年遊擊改設參將統轄左右兩營裁右營遊擊撥巡船五隻入蘇州營乾隆三年改守

兵三十九名為步戰兵又撥馬戰兵七名守兵八名入本標右營

中軍參將一員 中軍守備一員 千總一員 把總四員

外委千總一員 把總二員 俱駐劄府城

馬戰兵四十二名步戰兵五十一名守兵一百八十名

官坐馬二十四匹戰馬四十二匹巡船五隻 歲需俸

薪餉乾連閏銀六千二十四兩四錢米一千一百二十

三石二斗 生息營田二百五十畝六分零 充賞恤營兵婚嫁喪

右營 順治四年設康熙元年裁十三年復設原額遊擊一員守備一員千總二員把總四員馬戰兵一百五十

名步戰兵二百二十五名守兵三百七十五名巡船十八隻十四年裁馬戰兵一百名步戰兵二十五名守兵

一百二十五名撥巡船八隻入蘇州營二十五年改步戰兵一百名為守兵又裁馬戰兵二名步戰兵四名守

兵十二名三十五年裁步戰兵八十二名三十八年調守兵一百名赴河標雍正二年撥步戰兵一名守兵六

名入太湖營五年撥守兵三名入蘇州營七年添設外委千總一員把總二員仍食馬戰兵糧八年撥把總一員守兵二名入泰州營十年裁遊擊屬參將統轄撥守兵三十名入蘇州營乾隆元年撥馬戰兵一名入泰州營三年改守兵二十五名為步戰兵又撥左營馬戰兵七名步守兵八名入本營

中軍守備一員 千總二員

把總三員 外委千總一員

把總二員 俱駐劄府城

馬戰兵四十一名步戰兵五十一名步守兵一百八十八名官坐馬十四匹戰馬四十一匹巡船五隻 歲需俸薪餉乾連閏銀五千五百四十七兩七錢六分四釐米一千三十六石八斗 生息營田二百四十九畝八分

零

蘇州城守營

順治四年設撫標左營五年裁併中軍康熙元年改為城守營原額遊擊一員守備一員

千總二員把總五員馬戰兵四十名步戰兵一百五十五名守兵七百六十八名官坐馬二十四匹戰馬四十四匹巡船四十八隻二十二年裁減兵三十三名馬一匹撥馬步戰守兵一百名入海州營二十五年裁減兵二十九年名馬一匹是年又裁減兵三十名五十四年裁減兵五名雍正二年裁減兵七名五年添設右軍守備一員馬步戰守兵二百四十六名官坐戰馬十八匹七年添設外委千總二員把總五員九年添設左軍守備一員把總二員外委把總二員馬步戰守兵一百九十一名巡鹽壯丁五十名官坐戰馬二十一匹巡船十隻十年遊擊改設參將

參將一員 駐劄府城

中軍守備一員 駐防府城內長洲縣地方

左軍守備一員 駐防府城外 吳縣社壇

右軍守備一員 駐防崑山縣城

千總二員 一駐防元和縣周庄鎮管轄元和崑新各縣汛一駐防吳縣楓橋管轄長吳二縣汛

把總七員 一駐防府城內一駐防元和縣唯亭管轄元和縣汛一駐防吳縣木瀆管轄吳元二縣汛

一駐防吳縣社壇管轄吳元二縣汛一駐防長洲縣黃埭管轄長洲縣

汛一駐防崑山縣城 外管轄崑新二縣汛

外委千總二員 把總七員 協同經制千把總防守

馬戰兵六十三名步戰兵一百五十八名守兵九百九

十五名官坐馬三十八匹戰馬六十三匹巡船五十八

隻 歲需俸薪餉乾連閏銀一萬九千九百兩五錢二

分四釐米四千七百三十四石六斗 生息營田八百

九十八畝

是營防守吳縣長洲元和崑山新陽五縣地方 東至崑山縣萊葭浜

與松江營分界南至吳江縣境平望營分界西至吳縣境太湖營分界北至無錫縣與常州營分界

吳縣汛二十三

三條橋 五龍橋 蠡墅 廟堂橋 虎山橋 行春

橋 橫塘 木瀆東口 木瀆西口 橫涇鎮 王家

橋 善人橋 胥江 大日暉橋 長船灣 姚家橋

鐵鈴關 西山廟 西園 新開河橋 普安橋

白蓮橋 俞家橋

白長洲縣汛十八

白馬澗 射瀆 金雞 望亭 東隅 南隅 北隅

西隅 無量舖 周涇舖 蘿蔔舖 船場舖 王

家角 黃埭 泗港口 謝家角 淋橋 新塘橋

元和縣汛二十五

接渡橋 寶帶橋 黃華橋 高埭 大姚 周庄

陳墓鎮 明因寺 南口 東口 塘浦 周公址

角直西口 裏跨塘 外跨塘 六涇橋 小唯亭

大唯亭 壩基橋 尹山橋 夾浦橋 桐橋 聖堂

灣 北濠 楊安浜

崑山縣汛七

尚明澱 角直東口 新洋塔 紅廂渡 漲浦 黃

倉涇 三江口

新陽縣汛十一

真義鎮 九里橋 裔子舖 小瀆 巴城鎮 大王

廟 窰頭 大西門外 楊孜橋 小瀆北口 金童

橋

雍正五年提督魏經國奏畧蘇州城廣四十五里內外關廂居民櫛比城守營經制兵七百五十四名所管水陸村莊河道大小汛地六十餘處在在需兵實屬不敷擬請添兵二百四十六名合為一千名之數俾內巡密而外防周至該營額設遊擊一員守備一員千總二員把總五員分防內外汛地原無不足惟是崑山一汛素稱劇邑水陸汛

地九處向派千總一員專防難以兼顧擬將現設之中軍守備改作左軍照舊駐防蘇城再添設右軍守備一員令其駐防崑城仍帶千把一員專防城外汛地則任分力專可免疎虞兵部覆准奉旨依議浙江總督李衛酌議蘇郡地方營制分防疏畧蘇州財賦重地五方襍處人烟稠密宵小每有潛匿於闖闖編民之中而難以究詰者即如各路青藍布疋俱於此處染色必用大石腳踹研光習此業者率皆單身烏合不守本分之輩雖其中亦間有食力貧民而桀驁不馴者頗多臣等悉心會查蘇城地方叢雜者如胥閭二門自虎邱前後山塘南北濠楓橋西北一帶為長元吳三縣犬牙相錯之處稽查彈壓文武官弁均不可少三縣印捕佐雜事務殷繁且駐劄城內相距既遠而地界交錯更有互相推諉之弊至於武職止有楓鎮汛千總一員尤慮顧此失彼蘇州府經歷係本府首領可以兼轄三縣地方擬將該員調駐社壇相近地方專司巡查一應差委槩行停止但經歷向無巡役於公項內雇募二十名令該員帶領巡緝凡各坊踣匠以及盜賊鹽梟等項不法之徒即令就近會同營員查拏錄俱解審其武職千把官職卑微不足彈壓查撫標兩營中軍遊擊二員足以統轄右營守備遊擊似可裁省以所裁之俸薪改設蘇營守

備一員把總二員所添亦屬無多將此守備帶把總一員駐於踣坊最多適中之社壇汛又把總一員駐於黃埭汛此外如半塘南北濠陸墓王家角長蕩河冶長涇許家灣新塘橋等處均屬緊要汛口以舊有之外委千總一員并添設外委把總二員酌量派撥水陸設防與經歷一體巡查如有盜匪重情各照所管地方分別專汛兼轄處分蘇州城外右營額兵七百九十七名去公糧塘撥往來差役及各官隨丁字識跟役外所餘兵丁分派各汛為數無多而防範巡查實有未足查常州營現有中左右三軍蘇州營亦應循照此例左軍改為中軍舊有守備一員千總一員撥在城及周莊木瀆沙河四汛兵丁照舊分防其所請添設之守備一員把總二員并舊有千總一員外委千總一員帶原防楓橋汛兵定為左軍將許關汛把總一員外委把總一員及原防兵歸併管轄統成三軍營制就近令巡撫專管督率操練指揮緝捕仍聽提督統屬閭胥門外應添各處水陸塘汛在在需兵而下江地廣汛繁均難抽調惟京報部文巡撫衙門向係雇募遞送每年工食銀一千五百兩於通省耗羨公項內動支提督衙門因無工食向於各營抽撥兵丁一百二十八名逐塘遞送似應照

撫標例亦於耗羨公項內每年給銀一千五百兩以為工食一體雇募將舊撥一百二十八名同原撥蘇州巡鹽兵二十名及撫標所裁遊擊員下隨丁十五名字識跟役十五名再撥馬十三匹一併歸入蘇州左營此外不敷水陸汛兵將鹽政衙門專在蘇州巡鹽壯丁五十名亦撥入該營充當水兵巡哨於撫標向設小巡船二十隻內抽出十隻應用交與守備等管轄並聽經歷稽查所需餉米於浙省鹽務節省盈餘項下發給承為定例其巡鹽哨丁聽商另為雇募至蘇州重地遊擊守備員缺均屬緊要嗣後應令督撫提督會同揀選題補所設經歷千把亦須幹練之員并於通省文武中職銜相當者揀選咨部調補其馬步戰守數目水陸汛防官署營房統俟請旨恩准之日另為咨題

平望營 順治三年設遊擊於平望鎮後移駐吳江縣城七年改設守備舊額守備一員千總一員把總二員馬戰兵十九名步戰兵五十七名守兵二百三十名官坐馬十匹戰馬十九匹巡船二十隻康熙五十四年裁守兵三名雍正二年撥步戰守兵三名入太湖營五年撥守兵三名入蘇州營七年添設外委千把總三員仍

食馬戰兵糧十年守備改設都司僉書
舊屬提標今改歸撫標蘇州營統轄

都司僉書一員 駐防吳江縣城 **千總一員** 駐防平

把總二員 一駐防同里鎮一駐防震澤縣城

外委千總一員 把總二員 協同經制千把總防守

馬戰兵十六名步戰兵五十九名守兵二百二十二名

官坐馬十一匹戰馬十九匹巡船二十隻 歲需俸薪

餉乾連閏銀五千九十七兩四錢六釐米一千一百五

十八石三斗

是營防守吳江震澤兩縣地方

吳江縣汛十三

平望東口 平望南口 黃家溪 積慶汛 大船舫

以上駐防平望千總所轄 同里 庵村 少垢庵 龍王廟 蓑衣

浜 三里橋 原名七里港 南關 白龍橋 以上駐防同里把總所轄

震澤縣汛七

八圻 平望北口 敵樓 梅堰 盛家舍 確坊

壇邱

江南提督標下

提督駐劄松江府標下在府界者為太湖福山二營及左前後三營所分轄汛地

太湖營

康熙三年浙江總督趙廷臣江南總督郎廷佐會議太湖跨蘇常湖三府為盜賊淵藪題置江浙太湖營於洞庭西山之角頭設遊擊一員守備一員千總二員把總四員步戰兵二百四十一名守兵六百四十八名官坐馬二十二匹沙快吧唬船三十二隻三十五年裁步戰守兵二十名五十四年撥守兵五名入吳淞

營雍正二年以舊設之遊擊一員千總一員把總二員兵四百二十五名官坐馬十二匹沙快船十六隻立為浙江太湖營仍駐洞庭西山別於東山增設參將一員守備一員千總一員把總二員兵四百九十名官坐馬十八匹沙快船十五隻兼統原設守備一員千總一員把總二員兵四百三十九名官坐馬十匹吧唬船十六隻分左右二營為江南太湖營五年撥守兵九名入青村營七年添設外委千把總六員仍食馬戰兵糧八年裁沙船二隻九年添設馬戰兵七十名馬七十匹乾隆十二年參將改設副將兼轄浙江太湖營

副將一員 駐劄洞庭東山 左軍守備一員 駐防震澤縣簡村

右軍守備一員 駐防宜興縣周鐵橋

千總二員 一駐防鮎魚口一駐防馬跡山

把總四員 一駐防東山一駐防震澤縣吳淞一駐防吳縣鼇山一駐防荆溪縣鳳川

外委千總二員 把總四員 協同經制千把總防守

馬戰兵七十名 據本營來文云續於遵 旨議奏事案內議裁改四十八名現在陸續裁改實存五
 步戰兵二百名 改馬為步現增二十名
 守兵六百六十名
 坐馬三十二匹戰馬七十匹 現存五匹
 沙船三隻大快船七隻吧嘍船十六隻小快船三十二隻歲需俸薪餉乾連閏銀一萬五千三十八兩七分米三千三百四十八石

是營防守吳縣長洲吳江震澤四縣及常州府之陽湖無錫宜興荆溪四縣地方

吳縣汛二十一

茅圻嘴 木凌橋 凌一作履 水東 靈湖嘴 韓瀆港 胥

口 以上左營駐防鮎魚口千總所轄 汲水橋 廢里 楊灣 余山

長圻 三山 白沙 澗橋 以上左營駐防東山把總所轄 龍山 頭

陀橋 辛橋 長沙 漫山 銅坑 呂坡橋 以上右營駐防

龍山把總所轄

長洲縣汛一

金墅 右營駐防馬跡山千總所轄餘屬常州府不載

吳江縣汛六

牛腰涇 澣稍橋 瓜涇港 七里港 白洋灣 莫

舍港 以上左營駐防鮎魚口千總所轄

震澤縣汛十五

洪廟港 前成湖 大村嘴 陸家港 長板橋 吳

家港 以上左營 守備所轄 吳淞 因瀆 永定 蔣定港 孃孃

廟 蒲池港 灘缺口 練茶橋 烏昏 以上左營駐防 吳淞把總

雍正二年兵部議覆總督查弼納等題請將太湖營原

設遊擊一員改為參將添把總二員原設兵二百七十名

巡船八隻再添兵六十名巡船四隻仍駐洞庭西山居中

調度江南所轄之鮎魚口簡村等處俱屬東山原設把總

一員兵七十五名巡船五隻今令該把總帶原兵五十名

巡船一隻仍駐東山餘兵二十五名分防鼇山其鼇山原

設千總一員改設鮎魚口原兵六十九名巡船三隻再添

兵三十一名巡船三隻管轄東北一帶地方簡村應添守

備一員添兵一百四十五名巡船五隻分防各汛周鐵橋

原設把總一員兵六十八名管轄汛口九處今應改設千

總一員原名六十八名再添兵三十二名原有巡船三隻

專管八汛其周鐵橋原設之把總移駐馬跡山另添兵五

十名巡船二隻專管馬跡山汛以上改設參將一員添設

守備一員千總一員把總二員兵三百十八名巡船十五

隻分布巡防但太湖營遊擊係浙江省所屬之員湖西遼

瀾若止將遊擊改為參將仍駐西山究難兼管兩省地方

且江南湖濱盜案倍於浙江以一官而受兩省之叅罰亦

屬不便應於江南地方另添設參將一員以資彈壓其所

添兵數不敷分撥應於新添兵三百十八名外再添兵一

旨依議

乾隆十一年巡撫陳大受奏切照太湖為東南巨浸跨連

江浙兩省周遭數百里湖濱之接壤者江南則蘇州府屬

之長洲吳縣吳江震澤常州府屬之無錫陽湖宜興荆溪
 浙江則湖州府屬之烏程長興等十邑其水源發於天目
 經常湖杭三府地界總匯于湖支流派別曰澠曰溇曰港
 曰浦曰門曰口者不下二三百處宵小易於潛踪出沒湖
 中之山亦發源天目起伏環結自西北迤邐而指東南所
 指名者七十有二而馬跡東洞庭西洞庭三山其尤著也
 馬跡峙湖之北隅周一百餘里支分二十三灣居民萬餘
 戶西洞庭居湖之中央周七八十里支分二十餘灣居民
 亦萬餘戶東洞庭在湖之東南隅周五十餘里支分二十
 餘灣居民亦萬餘戶雞犬相聞號稱繁庶而湖邊迤邐一
 帶宜興長興諸山綿亘最為險遠逋匪窟匿其間往往為
 行旅之害此太湖水陸之形勢也防範之道以會哨巡緝
 為第一要務舊制設江浙太湖營遊擊一員駐劉西山居
 中調度統轄兩省湖而雍正年間江南添設參將一員駐
 劉東山將先設遊擊專隸浙江各分疆界管理又將太湖
 同知移駐東山兼司督捕亦以澤國要區不得不長慮卻
 顧也但全湖汛守原係一局大員總轄則呼應靈而責成
 專分員各管則推諉多而緝捕懈此事勢之必然者況湖
 中江浙分界處此不過就湖面約計非如陸路之可以定
 立確界也偶有失事彼此互諉各自通詳上司移咨會勘

動至數月難免歧誤且江省參將僅駐湖東南一隅所轄
 遼瀾有鞭長不及之虞浙省遊擊所駐西山為江南之地
 而管浙界之汛亦覺參差伏查浙閩交界所設楓嶺營兼
 管兩省汛地閩省之南澳鎮亦兼閩粵之銜分汛防守臣
 愚以為應將太湖營參將裁改專設副將一員兼江浙之
 銜統轄全湖駐劄西山居中撫制其遊擊一員改為都司
 同原設之守備千把各官分防各汛仍照江浙原舊地面
 管理調考官兵支領錢糧等事均仍舊制衙署不必更建
 廉俸所增甚微如此則責任專一聲勢聯絡可無推諉懈
 弛之患伏祈

敕下江浙兩省督提安酌議覆施行十二年江南總督尹繼
 善等疏伏查太湖一營自分隸以來迄今二十餘年紆匪
 鮮聞湖面頗為安靜兩省將弁亦不敢互相推諉彼此岐
 視惟是太湖營統轄全湖原係舊制部內議分之時亦止
 令分管湖濱各口而湖內仍令參遊公同巡查正恐各存
 畛域之故今全湖如得大員統轄事權歸一巡防更為有
 益應如陳大受所奏將江南太湖營改為副將兼江浙之
 銜兩省將備弁兵統歸管轄至奏稱副將移駐之處臣等
 相度形勢西山居湖之中東山偏於湖之東南就水面而
 觀西山似為湖中之樞紐統全局而論東山更為水陸之

藩籬蓋太湖駐為水師而東山迤東一帶逼近蘇杭大道與沿塘陸路營汛有犄角聲援之勢且山中烟戶三萬餘家俗野民刁非有大員彈壓不可與西山相隔四五十里一旆可達亦無鞭長不及之慮當日設立參將駐劄東山原有深意今改設之副將應仍駐東山無庸移駐再據奏請將浙省現駐西山之遊擊改為都司臣等查副將中軍例設都司但太湖以駐劄簡村之守備為中軍今參將改設副將原為便於統轄全湖起見而中軍之職掌無疎於前似可仍以守備為中軍職銜畧小亦屬因地制宜與體制無碍則駐劄西山之遊擊無庸改設都司以省更張其糧等事均照分隸兩省舊制副將雖統轄兩省湖面究係江省之員應聽江南督提考覈浙省遊擊以下等官俱由副將考覈轉呈浙省督提舉劾兵部覆准奉旨依議

福山營 順治初設副將四年改守備十六年改遊擊舊額七十名步戰兵一百九十名守兵六百二名官坐馬七十二匹戰馬七十匹官渡船四隻巡船十六隻康熙二

十三年裁馬步戰守兵二十九名馬二匹三十五年改步戰兵十名為守兵五十四年撥守兵十名入吳淞營雍正二年撥步戰守兵七名入太湖營五年撥步戰守兵八名入青村營七年添設外委千把總六員仍食馬戰兵糧九年添設沙船四隻隨船兵丁六十名

遊擊一員 駐劄常熟縣福山城堡

中軍守備一員 駐防常熟昭文二縣城

千總二員 駐防福山城一駐防昭文縣徐六涇

把總四員 駐防常熟鹿苑鎮一駐防昭文縣支塘鎮

外委千總二員 把總四員 協同經制千把總防守

馬戰兵五十八名步戰兵一百六十一名守兵六百九名官坐馬二十二匹戰馬六十四匹沙船四隻官渡船

四隻巡船十六隻 歲需俸薪餉乾連閏銀一萬四千
五百五十九兩一錢八分三釐米三千二百五十二石
六斗

是營防守常熟昭文二縣地方

常熟縣汛三十八

接官亭 戴渡 木排舍 張家田 吳塔

以上在元和塘南與

長洲船場舖接 太平港 湖橋 大河 王莊 西徐市 朱

家壩 田莊 繆橋 唐橋 鹿苑 慶安 西唐市

以上在縣西北界 烏沙墩 吳園墩 新莊墩 楊壩墩 黃

泗浦墩 方壩墩 三丈浦墩 奚浦墩 王英墩

小陳墩 大陳墩 江涇墩 西洋浦墩 黃涇墩

盧浦墩 鰻魚墩 洋涇墩 福山西墩 福山東墩

崔浦墩 繆涇墩 以上沿江諸墩西自烏沙墩接江陰寂瀆汛東至繆涇墩接昭文耿

涇墩

昭文縣汛三十七

北水門 大東門外 尖口 唐坊橋 梅李 珍門

廟 周涇口 文村 長毫 徐市 老吳市 張家

市 以上在縣東界 七星橋 鮎魚口 白茆新市 支塘 李

市 何家市 以上在縣東南界 耿涇墩 朱壩墩 海洋墩

胡涇墩 干步涇墩 嚴壩墩 許浦墩 周港墩

瓦浦墩 張涇墩 徐六涇墩 顧港墩 唐浦墩

高浦墩 金涇墩 舊塘墩 白茆墩 橫涇墩 沿江以上

諸墩西自常熟烏沙墩起至此並福山營所轄養鷺墩 橫浜墩 鎬脚墩 以上

三墩在昭文界屬 劉河營把總所轄

通志江防考云蘇州獨常熟為江海交會之地自孫吳時

西陵舉火達於南沙固已置烽墩於其地吳越錢氏嘗遣

其將屯許浦成福山列戌自此而始福山之上自烏沙港

東至黃泗浦三丈浦奚浦西洋浦以及福山堡皆福山營

汛福山與通州狼山相對為大江出海之門南宋韓世忠

所屯守處其堡城為侍郎胡宗憲平倭後所築今以遊擊

鎮之與北岸狼山三營隔江策應屹然雄鎮也 又海防

攷云自狼山而南與常熟福山相對為江海合流鹹淡分

界處烽戌相望一葦可達晉咸和五年石勒將劉激浮海

抄東南諸縣以入海虞此自北而南也唐中和間招討使

周寶討周郁於海上郁退保常熟走海陵此自南而北也

國朝康熙十九年始開海禁設立狼福對渡官船二十舸二十

四年復設海關許民出海貿易捕自是狼福之間往來者項

背相望其福山戌守始自明嘉靖間總督張經之議既而

操江御史高桂春請募水兵萬人屬參將操練胡宗憲又

請添置遊擊為蘇松應援並從之倭寇既平築堡於此

國朝因其舊制自福山東西二墩皆常熟界自二墩以東入昭

文界昭文瀕海之地其浦口之大者有三曰許浦曰徐六

涇曰白茆港許浦之地自宋乾道以前嘗從明州之定海

軍分兵駐守乾道六年水軍統制馮湛極陳許浦要害乞

移定海全軍屯此從之自是定水軍七千人置寨於此後

寶慶間吳英上建屯之議復分二千五百人屯浦東百餘

里今寶山之顧涇焉徐六舊本淺狹自田家壩鑿通以後

海潮衝齧遂成大口漁舟蟻集鹽船盜艘亦時闖入康熙

四十年間置堡守戍白茆港自明天順間總兵翁紹宗奏

置戍兵成化間復立備倭寨自徐六涇白茆出海有海外

薛家沙康熙六十一年允沙民所請亦設四墩分兵駐宿

州 隸通 按薛家沙自雍正十三年坍漲之後去縣遙遠今劃

提標左營把總所轄吳江縣汛五 把總駐防 盛澤鎮

盛澤西口 盛澤東口 茅塔 斜港 瀾溪

提標前營把總所轄震澤縣汛十一把總駐防震澤鎮

震澤北口 震澤南口 震澤東口 震澤西口 雙

楊 嚴墓 獅虎橋 十八里橋 九里橋 迓家漾

乾隆五年添設

提標後營千總所轄崑山縣汛十

菴葭浜千總駐防於此 大明浦 張家橋 蓬閬鎮 千墩鎮

陶家橋 渡城鎮 雞鳴橋 趙屯江 安亭鎮

提標後營把總所轄吳江縣汛五把總駐防蘆墟鎮

蘆墟北口 蘆墟南口 蘆墟東口 黎里東口 黎

里西口

蘇州衛明制詳見後舊志自兌運法行迄於明末武備盡廢 國朝革世職汰冗軍設守備千總專司漕務

順治四年每衛設掌印守備及經歷一員每所設千總二員十七年裁經歷康熙六年改所為帮每衛設千總

二員更番領運

掌印守備一員

前帮領運千總二員領旗丁一百三名漕船一百三隻

後帮領運千總二員領旗丁六十六名漕船六十六隻

本衛原設左右中前後五所其後所向分立為嘉興所止存四所以左右二所為前帮中前二所為後帮

附錄宋元明舊制見范盧王諸志舊府志云自宋以前舊志無考

宋軍制

禁軍

威果第二十八指揮

元額五百一十人
在萬壽寺北

威果第四十一指揮

元額四百一十人
在社壇東

威果第六十五指揮

元額四百一十人
在報恩寺西

雄節第九指揮

元額五百一十人
在府學南

全捷第二十一指揮

元額四百一十人
在城西北鴻橋西

舊志每指揮各置都虞侯指揮使副指揮使都頭副都頭

錢米衣賜各有差

盧志宋初盡選驍勇部送闕下以補禁衛餘留本城康定初置宣毅軍大州二營小州一營慶歷中募健勇為宣毅或選和軍為之蘇州一指揮熙寧三年改威果嘉祐四年詔置禁軍三指揮其新招禁軍以威果為額大觀二年詔望郡別屯

一千人一為威果一為全捷並以步軍五百人為額四年撥杭州威果第二第三指揮蘇州駐紮宣和二年因討睦寇仍之亂詔增置戍將五年下江浙諸州各置威果全捷兩指揮隸侍衛步軍 范志載知平江府李壽朋申補新軍并省割節文訪得禁軍元額二千三百三十人今在籍者一千七百五人而已壽朋多方招募刺到六百三十人填足元額分番教閱立格激賞又國家置弓手土兵以警盜賊本府六縣所管寨多關額已招填到四十八人外如廂軍遞舖又收刺到八十一人并令閱習與禁軍一般支犒證得月給錢米春冬衣賜賞射支犒一歲約十萬餘緡並本府自行計置不敢上瀆朝廷省劄證得平江府先招禁軍五百人今又招到六百三十人合證鎮江府例令為一軍分立隊伍別選將官專管訓練不許諸司州官等差借私役 又吳門事類云紹定間吳淵為浙西提刑相度軍營舊址可建五百楹又以放牧新寨多閒曠地請於朝得一千三百楹徹而新之號日新營使歸其行伍安其室家不襍處民間復為市田千一百八十九畝歲收米千三百一十五石司之廩人為軍中喪葬吉凶之費每一人給廿券為之定式

廂軍

諸州之鎮兵各隸本城專以給役內總於侍衛司而兵部掌其政令

崇節第九指揮

崇節第十指揮

崇節第十一指揮

崇節第十二指揮

盧志按事祖廣記天禧初杭州言本城老浙兵指揮乞別命軍額詔以崇節為名熙寧二年兩浙廂軍曰崇節加教閱二字於軍額四年樞密院請以諸路不教閱廂軍併為一額餘從省廢每指揮毋過五百人元豐四年詔兩浙步軍自捍江而下三並改號崇節凡為五十一指揮總一萬九千人

橫江指揮

紹興五年令臨安平江鎮江等處各招置水軍教習戰船以備禦敵並以五百人為額橫江為名

寧節第三指揮

係養老將校初與牢城為一乾道九年樞密院奏以寧節為名

開江指揮

五代錢氏創宋因之有卒千人為兩指揮第一指揮在常熟縣西北偏今為尉司教場第二指揮在崑山

縣西南偏一在吳江縣南城按吳越時置都水營田使主水事募卒為都號曰撩淺亦云潦清指揮范仲淹奏疏亦云曩時蘇州有營田領四都共七八千人專為田事導河築堤以減水患本朝以來江南圩田浙西河塘大半隳廢嘉祐四年招置開江兵士立吳江常熟崑山城下四指揮每指揮二百人八年五月兩浙轉運司請撥常州望亭廢堰兵士隸蘇州開江指揮就崑山置營與修至和塘岍元豐六年樞密院裁定止以八百人分布諸浦逐閘執役崇寧四年蘇湖秀三州開江兵士共一千四百人并使臣二員提舉常平徐確奏請毋得勾抽差使違者以違制論宣和二年提舉趙霖興修水利四指揮添置共二千人每指揮五百人自朱勔進花石綱盡奪營卒以往建靖之後不復招填紹興二十九年監察御史任古於常熟崑山各招填一百人其後止有城下吳江兩指揮兵士百餘大半力役於官乾道初轉運判官陳彌作知府沈度開浚十浦請仍招置兵士常熟崑山兩縣各一百人仍於本府見管使臣內差選二員部轄開浚自此以後勤水力穡之事有司無復講矣 盧志元文

北城指揮

熙寧八年置元豐三年敕北城兵士大城五十人小城三十人專充修城大觀元年帥府置北城兵士四百人列郡三百人崇寧五年置北城指揮

中軍鼓角指揮

元額二十五人

作院指揮

元額一百人熙寧元年置與北城並隸工部

諸寨

御前許浦水軍寨

在常熟縣許浦鎮初建炎以來水軍嘗戍江陰及許浦福山無定所而江陰官兵人船分屯明州定海縣紹興二年呂頤浩乞命仇念等專管浙西乃以念為福建兩浙淮東沿海制置使置司許浦九年併歸浙東安撫司十年知平江府梁汝嘉兼浙西沿海制置使三十年兩浙西路馬步軍副總管江陰軍駐劄李寶嘗駐軍許浦涉海進山東奏膠西之捷仍駐江陰乾道中改隸殿前司以三千人為額五年冬改為御前水軍六年李彥椿自江陰移屯許浦統制馮湛申許浦鎮實控扼之要比之江陰定海尤為良便乞於此屯駐大軍三省樞密院劄付平江守臣汪

應辰委常熟縣丞秦焯同水軍統制差來使臣踏逐寨地應辰奏據差委官申所定合立寨基並係人戶屋宇墳塋田土許浦去海百六十餘里既非緊切控扼之地而其要害去處又却無備徒使一方田廬墳墓復不能保伏望特降睿旨施行上竟從湛請就許浦立寨初水軍元額一萬四千人分為四軍八將六十二隊於內分撥三百人江陰駐劄七年奉旨以七千人為額淳熙三年馮湛奏請再招收一千人奉旨增額五百人五年于友奏乞增額五百人十五年水軍統制胡世安言本軍自定海移駐許浦是時水深可以泊船後來潮沙漸塞船泊顧涇水軍仍在許浦相去三百里緩急難以相就合依舊歸定海紹熙元年奉旨發到福州寄招梢釘水手三百二十人併續發到水手一百八十人付司收刺嘉泰四年令招募情願充應販倭人二十人開禧二年馮拱申海船百隻水手不敷乞招收三色軍兵五百人又乞招收武藝精熟識見可用一百人奉旨並依嘉定十五年都統制吳英申乞增招梢釘水手八百四十人刺充勝捷吐渾與元管軍兵總以萬人為額江陰亦有許浦都統司防托兵船紹定三年樞密院劄下本軍權行節制 盧志參琴川志

忠順官寨

在報恩光孝寺後淳熙二年建

御前拱衛水步軍寨 在北寺東 景定初創

御前遊擊軍寨 元額三千人 或五百人

御前忠勁軍寨 元額一千五百人與遊擊軍 寨並在北寺西寶祐中創

忠節水軍寨 淳祐九年浙西安撫使趙與憲奏乞於福山魏江 江灣三處各置戍兵三百人以防江面從之隸提

刑司一云額管五百人其江灣寨在嘉定縣東南吳淞江口 以上俱水軍寨

吳長寨 在閶門外西北游 聖去縣二十七里

角頭寨 在吳縣西 南九十里

福山寨 在常熟縣北 四十里臨江

許浦寨 在常熟縣東 七十里臨江

白茆寨 在常熟縣東 白茆海口

平望寨 在吳江縣 南四十里

楊林寨 在崑山縣東北八十里有閱武亭紹興四年巡檢和通 建范雩記 以上鄉兵山水寨並建炎後置即巡檢寨

土軍各一百四十四名保伍中取之三丁籍一亦名義 兵歲以十月起聚教至正月中散人日給錢百米二升

牧馬寨 大寨八小寨十七散在城內每歲四月差統兵官總轄 收放九月回中興繫年要錄云初殿前司奏乞令平江

府買民田為寨地既許之給事中賀允宗言此田皆極上腴 民間豈肯輒售乞以係官荒閒地與之詔所占如非稻田令 府司優償其直諸軍舊有廢屋數千區茨以茅竹歲一更葺 而財力皆出於民紹興十八年殿帥楊存中乞於平江添蓋 牧馬屋詔所費並令官給二十八年命平江以係省錢改造 瓦屋二千五百間知府蔣璨請出內帑佐費詔以御前激賞 庫錢七千緡賜殿前司既又 益五萬二千緡付逐軍自蓋

元軍制

鎮守平江十字路萬戶府翼 在卧佛寺西有鎮撫所及各千戶 翼鎮撫所理本府軍事千戶翼凡

十日淄萊翼東平翼大明翼廣平翼真定翼大都翼河間新軍翼河間舊軍翼濟南新軍翼濟南舊軍翼並在萬戶府左右設置各治本處所附軍府事

奧魯翼在草橋北係杭州益都萬戶府所委管領平江新附官軍

許浦通事漢軍萬戶府在常熟許浦

水軍都萬戶府在崑山州

支分兵馬司在舊崑山州治東

鎮守長橋鎮江水軍萬戶府在吳江長橋至元十三年丞相伯顏引兵南下命千戶甯玉等部卒

復修長橋通道設置

崑山縣所屬巡檢司四所巴城 崑山 石浦 楊林

吳江縣所屬巡檢司八所簡村 震澤 長橋 平望 同里 瀾溪 因濱 汾湖

明軍制

衛所舊有蘇州太倉鎮海三衛崇明吳淞二守禦千戶所今惟蘇州衛在府治餘俱在太倉州界不錄

蘇州衛指揮使司吳元年以所俘張士誠軍士建衛命指揮使

吳良掌之領左右中前後五千戶所統軍五千六百名隸中

軍都督府指揮使三員內掌印一員同知六員僉事十二員鎮撫二員經歷一員千戶十員百戶五十員衛

署在飲馬橋西即宋府倉基元淮南行中書省左中二千戶所在正堂東右前二千戶所在正堂西

西經歷司在堂右 旗纛廟在中門東 鎮撫司獄在衛治西北穀市橋 軍器局在衛治內西 衛倉在西北隅即

元百萬倉基吳良置後附永豐倉 教場在北城下報恩寺後 左千戶所營在葑門內右千戶所營在闔門內中千戶

所營在盤胥二門內前千戶所營在婁齊二門內後千戶所分立為嘉興守禦千戶所

營寨

白茆寨

在常熟縣東北九十里海口天順五年鎮守都指揮使翁紹宗奏置每春夏蘇州衛分委指揮一員千戶二員百戶四員領軍士四百餘人至此操練備倭置船四艘巡哨官軍俱至秋末還衛又立教場備官醫療疾成化十八年都指揮郭鏞復立備倭軍營又造官廳鼓樓軍房七十餘間正德十六年重濬白茆俱遷建新開河口嘉靖中因倭患撥衛所官軍遊兵把總及廣福蒼沙等船水陸共四千餘人在港防守又建朱家堡於近地

福山營

在常熟縣福山明初命蘇州太倉二衛分遣百戶一人更番駐劄嘉靖甲寅倭警巡按御史孫慎建議築堡設把總指揮統水兵在江巡哨府縣官統陸兵在鎮屯守

太湖營

萬曆十六年巡撫周繼置先是嘉靖三十四年巡撫曹邦輔於東洞庭山置司馬寨梁山哨渡船營北湖口營長圻寨烽圻寨毛園哨嘶馬哨西洞庭山置龜山寨向頭寨石公寨圻村寨以耆民為團長選練鄉兵至是繼立太湖營劄委把總領兵二百二十名崇禎元年巡撫李待問奏置把總一員添兵一百五十三名遊沙唬船二十隻十一年巡撫張國維又設總練於龜山嘴及莫釐山之綠野橋

巡撫軍門標下四營

萬曆十六年巡撫周繼調取各縣民壯置陸營天啓二年巡撫王象恆抽選陸營兵

更置團營崇禎元年巡撫李待問召募水兵分隸蘇州六門濠河號水營以上東陸營守備一員兵四百名西陸營守備一員兵四百名東塘內河水營把總一員兵二百名西塘內河水營把總一員兵二百名團營守備一員兵四百名標營都司一員兵三百名

兵備道標下四營

正德七年兵備副使謝琛奉旨募民間壯勇募三百名自後屢有增益建立陸營官軍民兵共六百六十四員名天啓元年軍門團營抽去民兵十一名又內河總巡

官請去水兵三十四名二年又請去中軍官一員水兵六十名分立水營五年本營又請去二十名崇禎十年立中權營抽去兵八名十四年請復馬兵一名陸營實存中軍守備一員領兵官二員聽用官二員民兵三百四十四名太鎮兩衛軍一百八十二名水營天啓二年分立中軍守備一員水兵一百十四名中權營崇禎十年立領兵官一員兵一百八十八名十四年續補新兵八十一名抽蘇屬各營兵六十八名標營萬曆十九年召募浙兵一百三名分為三哨充本

道親兵天啓二年添置兵一百四名

舊志曰明初設置衛所屯操守禦倣唐府兵遺意軍省衛民之勞民無養兵之費制誠善也迨乎中葉承平日久武備漸弛兼之兌運法行更番上下不復知有戎事矣其後變故頻仍盜賊蠡起而軍疲戈斃不堪禦敵於是始開召募謂之民兵其於衛所弁卒遴其長者置之行伍謂之選鋒雖雜處營壘間軍自軍而兵自兵不相混也然皆虛糜俸餉無裨於用以至於亡而不可救今凡篇中稱軍者衛所之額軍稱兵者召募之民兵

巡檢司

木瀆巡檢司

在縣西南三十里木瀆鎮洪武二年置管閭胥盤三門外及木瀆橫塘新郭三鎮

橫金巡檢司

在縣西南四十二里橫金村洪武三年置管二都三都及沿湖地萬歷三年裁併木瀆司

月頭巡檢司

在縣西南八十五里洞庭西山初轄東西兩山成化中分置東山司後止轄西山

東山巡檢司

在洞庭東山成化十七年巡撫王恕奏置專管東山以上並吳縣

吳塔巡檢司

舊在吳塔洪武二年置後移齊門外蠡口管閭門下塘山塘并婁齊二門外

陳墓巡檢司

在陳湖東洪武十八年置管葑門外獨墅大姚至角直浦以上並長洲縣

石浦巡檢司

舊在縣東南四十里石浦鎮宋祥符中置明景泰二年移置千墩浦口嘉靖十年復遷吳家橋有烟墩十一座

墩十一座

石浦口 夏駕口 陸巷涇 唐梨涇 新塘口 張浦口 刁瀆口 太直港口 諸天浦口 潭港口

墩浦

巴城巡檢司

舊在縣西十五里朱塘鄉三保高墟村洪武三年置後徙真義村有烟墩十二座 狀元涇 綽墩

圓村 眞義 夏尖 景村 黃巷 李長墳 新

白茆巡檢司 在縣東北九十里抵海洪武初置有烟墩十一座

衙前 雙浜 又塘 河舍

黃泗浦巡檢司 在縣西北八十里抵揚子江洪武二年置有烟

莊港 奚浦港 西洋浦 黃

福山港巡檢司 在縣北四十里北抵揚子江東抵海有烟墩十

龍王廟 曹橋廟 曲塘 興福 興塘 涇

許浦巡檢司 在縣東北七十里北抵揚子江東抵海有烟墩十

墅 陶舍 丁涇塘 雙廟 四叉 衙後 耿溼 九里 尚

長橋巡檢司 在縣東二里松陵驛東管三都東西二十三都二十五都

簡村巡檢司 在縣東南十五里充滿管一都二都四都十九都

因瀆巡檢司 在縣東南一百里吳淞村管五都六都七都八都

震澤巡檢司 在縣西南九十里震澤鎮管九都十都十一都十二都

平望巡檢司 在縣東南四十五里平望鎮管十八都二十都二十一都二十二都二十四都

汾湖巡檢司 在縣東北四十五里蘆墟村管二十八都二十九都

同里巡檢司 在縣東北十五里同里鎮管二十六都二十七都

爛溪巡檢司 在縣西南九十里嚴墓村初在縣西南爛溪鎮永樂中移此管十四都十五都十六都十七都以

上並吳 江縣


以上每巡檢司各設弓兵四十名

按巡檢卽古之游徼也始於宋沿於元明初尤重之各

處增設雖文員之雜流而實兼武事

本朝多所裁革弓兵僅存十二名已與武備無關故止見於職

官云



蘇州府志卷第十八

文化乙丑

